


T 5241.28/399

HARVARD COLLEGE LIBRARY
FROM THE
HARVARD-YENCHING
INSTITUTE
JAN 5 1932

3

~~ChL 5227.8/399~~



江左十五子詩選卷九目次

商丘宋 犖牧仲選

毘陵邵長蘅子湘訂

商丘宋 至山言校

顧嗣立

言襄十首 選四

夏日間居限跂腳北窗下為韻五首 選三

雨中游西湖用東坡韻

湖心亭二絕 選一 十番行

串月歌 祭書行 并序

冬春行



江左十五子詩選卷九目次

首夏十兄復作都門之游病中用己巳留

別元韻送之五首 選一

聽度曲贈顧君言四絕 選三

秋日遣人至西充作家書後附寄四兄四

首 選二 哭大兄

哭俞犀月八首 有序 選二

題元百家詩集後二十首

宋中丞署中新構一軒顏曰深淨卽以二

字爲韻賦詩命余和韻二首

文與也先生過訪畱宿草堂卽事奉贈

竹林寺

焦山

渡江

渡黃河後復至清江浦訪周岷公

宿紅花埠二首 選一

新泰道中 琉璃河

送錢唐王文在之任鄆都

遊鶴林寺

十四日抵莫步至避風禪院坐釣魚臺望

江復沿江岼取徑經昭關踏月歸寓

平山堂懷古

登北固山

秀水訪朱竹垞先生賦此奉贈

過西興

望蕭山

峽山行

并序

謁禹陵

南鎮

鑑湖

題文南雲先生雙松圖

曉自上沙山莊遊白雲泉過龍門大小石

屋登天平山絕頂望湖臺至蓮花洞小

憩寬路遶澗歸次介于韻

晚度小嶺由龍池遊華山松徑次介于韻

題宋二山言學詩圖四絕

選二

題曹希文同年我與我周旋圖三首

登香爐峰

發嚴州聞畫舂

江郎山

四月三日度仙霞關

夜宿漁梁嶺下畱題店壁

清流船歌

彌陀灘

黯澹灘

延平津

五月九日初食荔枝

自題噉荔圖十絕

選四

自雙溪口出建陽道中得四絕句

選三

六月四日晚泊武夸山下步遊沖佑萬年

宮

六日舟入武夸自一曲至六曲六首

望接筍峰
小九曲夜坐二首

望郎回

紅花埠店壁次湯翰林西厓韻

新泰道中
雄縣懷古

題座主慈谿姜先生遺跡

司寇新城王先生從都門寓書見存云將

有精華錄之刻喜而賦四絕句

選二

十九日商丘公以東坡先生生日懸像小

滄浪率馮山公汪武曹右衡張日容天

申韓祖語吳荆山令子山言及余拜祝

因成長歌一章余亦繼作

二月朔日查山探梅集六浮閣分得佳字

靈隱寺
韜光菴

冷泉亭
飛來峰

天竺寺
葛嶺

紫雲洞
玉泉寺

過天章寺

遊宛委山尋陽明洞遇土人指示飛來石

詩以紀之

雲門山

登臥龍山

三月十三夜邀竹垞先生同馮文子吳寶

崖周層巖泛舟西湖看月得六言四絕

選二

讀元史八首

選四

讀洞庭吳烈婦施氏遺詩

并序

擬白香山樂府四首

城西嫗

煮鹽商

關中民

賣柴翁

江左十五子詩選卷九目次

江左十五子詩選卷九

顧嗣立

俠君長洲人著有秀楚草堂集金焦集山陰集嗽荔集大小雅堂詩

言襄十首

選四

靜女恥无媒金閨寧失偶君子動以禮瓮牖甘獨

守當其進身初實為萬事首无端喪名節羣論笑

芻狗古人先品行取士必某某自從文字興璵璠

溷塵垢素衣化為緇瘦馬沿門走昏夜乞人憐朝

來輒自負世路盡斯人吾將與誰友

古人重讀書功名不足驚今人重功名讀書存其

名一登要路津棄置鴻毛輕燈檠有長短炎涼從

此生不學羞无術何以蒞編氓南華非僻書請君
試一評

農夫不用力雖畊不如止士人不用心雖生不如
死夏簟書室清冬缸夜檠紫輟食便甘寢百年風
過耳何異景升牛一轡享軍士不思先聖言博奕
猶賢已晨興理髮坐驅蠹啟文史孜孜復汲汲中
宵弗遑此非貪身後名聊盡身前爾

詩中集大成萬古一少陵昌黎韓吏部光怪方騫
騰香山白太傅蕭散神仙稱要皆從杜出奇正各
擅能後代有睂山落筆如雲蒸方圓成珪璧妍醜

肖其形四賢豈不偉泰華同峻嶒下視郊島輩不
翅蒼蠅聲再拜往從之天高不可登

夏日間居限跂腳北牕下爲韻五首

選三

六月畏出門闐寂嘆離索俄聞剝啄聲披衣忘赤
腳禮豈我輩設任真固所樂矧余腰腹寬性尤苦
炎虐起揖進盤餐醇酎非狂藥銜杯望密林隱隱
結樓閣日落夜涼生輕風啟簾幕

夜短不可眠日長不得食蚊蟲飛殷雷更僕供搔
抑草堂頗弘敞新篁漏埜色清漣繞一灣菡萏香
風逼結構本无多聊以消晝刻傳聞四方信盜賊

驚南北此生免荷戈高臥方太息時楚中有警

任性厭塵囂放情屬山埜不喜近俗人寧堪自云
雅圖書綴牙籤南面真何假光焰盛杜韓清源導
屈賈棟梁資斧斤鎔范賴陶冶寸陰古人惜而况
此長夏蚱蜢撲草根驟雨翻簷瓦一鈎新月斜覓
句空階下

雨中游西湖用東坡韻

四山同一雲朝來失山足水天青濛濛何處寄雙
目孤塔影崔嵬如龍起厓谷峯坳噴飛瀑鏡紋寫
松竹挈舟劈浪來平分湖面淥微風著布颿岍草

隨堤逐閑狎沙際鷗高羨天邊鵠人生何為者鬱
鬱苦局促剖腹藏明珠剛足抱璞玉莫怪士龍笑
何疑步兵哭錢唐佳麗地英雄逝何速簫鼓蕩中
流綺羅被山木今看塚纍纍王氣埋白屋風吹戰
骨腥陰雲時斷續興劇急回船不待夜秉燭裁成
風雨篇補入西湖錄

湖心亭二絕選一

湖面雨痕收亭添半篙水斜陽欲沈山明滅波光
裏

十番行

冬冬羯鼓財三搥鐵篴一聲紅日斜木魚閣閣檀
板按琮琤拈隔衆樂譁靜如細泉溜空谷諧如雌
鳳鳴孤竹彩鸞雙成齊進酒天公爛醉濛濛目須
臾金石習鏗鏘刀鎗甲馬爭騰驤颯然響絕四筵
靜華鐙耿焰搖中堂鶯管龍笙重按節輦婆稱手
彈離別絃索嘈嘈急雨飄雲鑼估栗胡琴切楓香
古調漸低迷耳根頃刻堪愁絕昔日岐王宅裏聽
池頭凝碧花冥冥海青血濺龜年散梧桐夜泣雨
淋鈴涼州一曲仙韶少月照思陵徧荒草白髮青
蛾鞠部頭殘山剩水江南老

串月歌

治平山寺何峒堯湖光吐納山動搖煙中明滅寶
帶橋金波萬疊風騷騷年年八月十八夜飛廉驅
雲落邨舍金盆出水耀光芒琉璃迸破銀瓶瀉散
作明珠千萬顆老兔寒蟾景相嚇魚婢蟹奴爭獻
奇手搯桂旂吹參差水花雲葉橋心布移來海市
秋風時吳儂好事邀新客舳艫銜尾排南陌紅豆
新詞出絳脣粉胸繡臆迴歌席綠蛾淋漓施樓倒
醒來月在松杉杪

祭書行

并序

賈長江嘗於歲除取一歲中所作詩以酒脯祭之曰勞吾精神以此補之余仿其意因取架上手自勘校諸書羅列秀埜草堂清香樺燭酒脯具陳再拜而祝之并邀亦陶犀月大臨日容同作祭書行

己巳十二月時序逼小除顧子草堂坐爆竹驚座隅回頭語童子此爲何聲與童子起且應家家歲云徂燭魚割鷺鴨列鼎獻生芻上以報皇天年豐少負逋下以薦祖禰兒稚爭提壺農工各有求貧富各有需主人日矻矻身不出戶閭老大空拓落

年年守故吾所抱果何願所讀果何書曷不訴蒼穹椒糝而要諸余聞輟然笑童子一何愚六經麗日月百家列珉珎龍門長叙事紙上露眉鬢離騷多愁苦痛飲高天呼莊生善寓言蜨夢自蘧蘧文選字詰屈熟讀常囁嚅風雅云誰師浣花有狂夫韓公狀南山白傅繪西湖崑體情綺靡香奩語麗都但求性所愛不徇俗毀譽宋元亦涉獵出類惟髯蘇陶冶奪天工黃陳堪作奴時或緡新曲鏤錯天花敷臨川遊戲筆字字等圓珠凡茲架上卷百城南面如柳風酒捲白荷露硯研朱拍案讀數過

豁然憤懣舒我今值歲盡免俗又何須散帙聊爾
爾縑緗堂几鋪隻雞爇爐香三拜進屠麻我欲謝
貧賤彼蒼不吾諛我欲乞富貴斯人非吾徒金多
亦何益官高亦何居但願身姦黠與書日日俱憂
患不能卻歡樂不能驅揮手謝童子甘作老蠹魚

冬春行

家家午飯霜風香黃雞作團雙翅張紅蓮玉粒積
成山峯巒咫尺生中堂我家連年遭苦旱田畝歉
收不及半官私逋負如蝟毛時詘舉羸空自歎行
官張望下鄉看雞犬荒邨聲帶酸傾甕翻瓶償得

穀一斛六百青銅錢薄田本只供饘粥尊酒盤餐
招客宿疎狂性不解謀生點金乏術徒頻蹙東鄰
西舍困廩稠春聲雜道風瀏瀏檢點空倉无長物
忍飢溷鼠還垂頭窮冬閉戶攤書讀來春生計知
何屬歛聞縣吏夜催租官倉算缺三升穀

首夏十兄復作都門之游病中用己巳畱別

元韻送之五首

選一

塞外提師鐵騎紛將軍揖客舊知聞

兄就館王將軍孝揚軍中

青油

幕下韓司馬綠水橋邊鄭廣文部響弓刀搖白羽
營飄旂旆裏黃雲蝦蟆更促平沙靜把酸敲詩到

夜分

聽度曲贈顧君言四絕

選三

天上秦青本謫仙
六么水調譜新編
女墳湖北紅闌下
獨占春風三十年

笙調笛亮稱湛浮
舌底牙根字字收
惆悵一生无限事
盡隨歌曲上心頭

一派簫聲遏莫煙
小園愁殺李龜年
落花寂寂人閑望
恰是江南三月天

秋日遣人至西充作家書後附寄四兄四首

選二

麥黃豆綠峽農多
酒釀郛筒臉易酡
癯婦蓂花行米市
熨童側柁踏巴歌
鄉心常動鵑嗁樹
政績新聞虎渡河
八十四盤嶺上月
相思兩地奈明何
落木蕭蕭宋玉宅
巴山夜雨近何如
三秋半破重逢閏
一歲中分兩致書
江勢直衝巫峽口
山形遙接劍門居
脊令不到瞿唐過
手疊紅箋望碧虛

哭大兄

半世耽山水如兄
襄抱難病來還喚
弟死去不求官霜
冷雁聲澀月孤松
影寒五年三慟哭
淚點幾

曾乾

己巳秋仲兄先歿壬申秋復丁
先母之艱今冬又來哭兄故云

哭俞犀月八首 選二

犀月先生與余交垂十五年戊辰春始就館余家服其學問淵博元元本本凡經史百家以至天文地理諸書无不淹貫胸中自是或春上梅花風來荷葉芭蕉滴雨莓苔裏雪逞逞把醜聯唵笑語於秀埜草堂中忽忽不自知其樂者六年矣今春二月二十有三日余有西湖之役與先生執手言別越九日歸而先生已辭世二日聞變震驚寸腸俱裂趨赴靈前哭奠追念曩昔讌遊之好邈若山河因滴淚和墨得詩八章冀

良友冥冥中鑒我也

元代文章付杳冥殘編斷簡聚英靈刪詩同恨江西派紀事爭看塞北形五夜推敲孤館雨三春談論草堂星知心賸有谿南老落月茫茫埜史亭 余撰

輯元詩與亦陶犀月晨夕商榷惜犀月未見成書而歿故云

西河一慟淚沾巾家難紛紛氣莫申三世半年同

作鬼

去歲九月令子先歿未幾幼孫又殤

一家八口仗何人訓狐黑夜林梢

喚魑魅青天屋角蹲造物昏昏渾不辨舉頭无處訴蒼旻

題元百家詩集後二十首

雄深出入少陵間金宋麤豪一筆刪恢復中原板
蕩後黃金端合鑄遺山

劉許高賢出處分雷溪豪邁氣超羣北人自有元
才子秋澗陵川各張軍

大德元貞老逸民剡源石屋句清新論詩笑殺方
虛谷還向江西拜後塵

長庚朗朗照戈矛窮海孤臣望雁愁何似萬松傳
訣後雄篇秀句逞風流

岳王墳上賦招魂狂李顓蘇伯仲論禾黍原陵遭
客訕國香零落怨王孫

會稽蜀郡各誇能星散天連得未曾從此東南詩
派盛狂瀾獨障是吳興

白獸黃羊扈從宜玉堂連直唱新詞上京雜詠流
傳遍館閣才華冠一時

彷彿唐人面目同虞楊范揭出羣雄縱然不作涪
翁社難脫風沙氣習中

溫醇峻潔散天葩黃柳齊名一郡誇排冑更生吳
老子天教文運屬金華

雄文大冊奏鏗鏘碑版穹窿翰墨場若問當年大
手筆瓣香未散是歐陽

樂府无題鬪綺羅宮詞濃豔奈愁何香生春動无
歸著翻出新聲西北多

天竺雨淋看點筆上林花滿聽鳴珂一官落拓詩
千首愛煞燕山薩照磨

宋室今无我亦无翠寒齋裏自歌嘯秋千庭院昏
黃月恰似高人胸次孤

病鶴揚州偏竦肩朱簾齊下笑喧闐誰知雨霽雲
開後依舊橫行萬里天

雕鐫更出唐人巧刻畫全非宋代麤才子一時工
詠物蟲魚花草費規橛

至正詩人喪亂頻崎嶇避難走跋跋青易白埜捐
軀日右榜緣知彼有人

樂府歌謠古意存蛇神龍鬼語銷魂竹枝唱到西
湖曲南北傾心拜鐵門

高士海巢辟地日老人湖上故宫思相憐只有梧
谿老不奈蛇橫天黑時

玉山佳處客停車侍宴紅裙韻致誇楊鐵倪迂尤
好事風流收拾到吾家

抱病聊馮著述傳同心三載集遺編元瑜不合先
長逝淚灑西風空問天

宋中丞署中新構一軒顏曰深靜卽以二字
爲韻賦詩命余和韻二首

風動碧篠響荷香襲衣襟衙罷吏人散幽禽聲滿
林高軒初落成陂唐暝柳陰游魚躍綠波秋水三
篙深中丞開宴至手折碧筒斟最愛新雨來颺颺
風中琴

東坡守膠西治法本清淨築堂名蓋公創事特新
穎我公實繼之深意伊誰省賦詩獄訟平揮塵烽
煙靖長空落斜易水浸蒹葭冷攜客坐清風屋角
橫秋景

文與也先生過訪畱宿草堂卽事奉贈

高人住深山偶然入城市譬如幽谷蘭移置玉堂
裏蕭疎迴絕塵百卉失紅紫竟日散芳馨三春誰
奪此先生隱竹塢閒情寄山水詩畫兩清絕遊戲
聊爾爾步履隨秋光欣然肯至止貌古識心古胸
次無渣滓酌酒問前朝自言能屈指東林黨錮興
忠義吳中士琅璫貫三木慘毒囹圄死吾家雖免
禍炭如肉在机瞥眼海生桑白髮今老矣埜老話
開元楊柳年年是何人撫遺文一一補詩史移席
坐花陰更鼓逢逢始甲馬響空檐金風自南起埽

榻勸安瞑桂魄浸牕紙一夜市廛聲空汙幽人耳

竹林寺

策蹇人影亂澹日動山腹江雲落深林龍蔥接厓
谷馬上頸脰勞木末顧童僕到門碧蘚淨瑣碎金
滿目無風衣袂涼參天萬竿竹嫩綠染須眉入手
不盈掬山僧重款畱折鐺茶正熟惜余別息息征
塗車歷碌何年參玉版禪牀容信宿好待月影長
新詩賦茅屋

焦山

山風撼樹涵波光一堆螺髻青微茫頭陀山高欲

鬪巧孤峯對峙江中央初從象山窺石洞槎枒古
幹遮僧房浪平沙煥瑩如鏡山影倒落十丈長同
遊好奇急解纜推蓬直漈山根旁振衣瞻拜焦公
像三詔洞口神飛揚沿江曲徑斷復連樹罅點點
飄颻檣攀援石磴上絕頂海門紅日搖搏桑江南
山色落檻外隋宮花柳烟中藏馮高遞嘯吸天風
一杯酒盡歌慨慷吳頭楚尾接京口豈無好事泛
野航相過率誇浮玉好雕闌畫棟黃金裝茲山隱
見幽絕處俗眼誰復如余狂瘞鶴穹碑字軒翥燒
藥寶鼎光輝煌掘雲採月得同侶相憐泉石疑膏

盲陰霞興沒看不定回頭但惜金雅翔搜索枯腸
出險語江山收拾詩人囊

渡江

雙槳衝波去船頭映夕曛客途隨日遠鄉夢與江
分鐘響煙中寺帆移樹裏雲餘霞浮水上噪影鳥
紛紛

渡黃河後復至清江浦訪周岷公

旋裹行裝雇橐駝又攜雙槳浪頭過暮年握手情
偏切客舍談心語更多隔岸馬聲嘶落照掠堤颿
影入回波飛鴻蹋雪真相似一日三番喚渡河

宿紅花埠二首

選一

烏鵲驚枝漏月光紅花埠裏白於霜十年照我江
南住今夜圓時在異鄉

新泰道中

野店孤邨難記名朝朝摩詰畫中行日高馬蹋峰
巒影市近風喧雞犬聲癯婦騎驢投午集秃翁驅
犢趁春耕田家况味真閑適媿我勞勞事北征

琉璃河

日欲沈如赤玉盤燕脂迸破莫天寬愛他六里河
中浪卻少鴛鴦對對看

琉璃河謂之六里河極清
泚尤多鴛鴦見范石湖集

送錢唐王文在之任鄆都

帝城斜日照香韉遠宦忠州路幾千人渡巴江秋
雨裏帆移巫峽暮雲邊官閒按月評花譜俸薄終
年抵酒錢想得啼鶻催月出吟成好費薛濤牋

遊鶴林寺

小橋流水漾江天古墓荒涼松樹邊

寺對黃鶴山山下有米南宮墓

蘇重尋米老字

寺壁石刻率多剝落唯南宮書城市山林四字尚存

擔瓶仍試寄奴

泉

寺中井名

秋風竹院人聲細

鶴林一名竹院唐人詩所謂因過竹院逢僧話又得浮生半日閒也

燈火禪房僧影懸

方丈懸馬祖遺像

夜半潮聲驚鶴夢月中

彷彿下芝田

十四日抵莫步至避風禪院坐釣魚臺望江

復沿江岬取徑經昭關踏月歸寓

江風吹日落餘光在山上水面結陰霞沈沈夜氣
王入寺俯峭壁縱目盡軋塊金焦兩冥濛歸鳥影
相向潮聲落空巖勢若翻甕盎此身渺一粟臨風
恐飄颺釣魚者誰子欣然忘得喪紆餘取歸路孤
光滋瀆瀆長嘯出昭關天風助悲壯江心起鞞紋
金波涌疊嶂蠟屐破松杉舉頭月正望

平山堂懷古

歐陽公手題扁額三字尚存

霜銷雲氣收日腳正亭午江光動碧瓦隔岬青可

數吳山隱密林淮岫蠹極浦積陰挾寒濤勢欲到
堂廡緬懷六一翁流風邁千古傍厓置棟梁于焉
運斤斧堂成集羣僚清詩日吟苦渡水采芙蓉皓
腕牽纖縷翠蛾趁月歌紅裙蹋筵舞遂使狐兔場
翻作圖書府茫茫五百年勝事今誰覩空餘三字
顏斗大映屋宇想當下筆時肘腋勞撐拄著紙墨
淋漓力挽千鈞弩形如鸞鳳翔結構各綴補歲久
墨花妍疎宕更媚嫵摩挲不忍去但以指畫肚夕
陽亂平蕪黃葉響山鳴蜀岡鳥上下迷樓送鐘鼓
何當春明來松翠潤細雨屐齒印庭綠挑泉嚙石

乳醉翁許爲徒千載作賓主

登北固山

城尖徑仄天地秋長空一覽江山浮風煙黯慘無
定態茫茫堆積萬古愁甘露寺邊初下馬多景樓
上重探幽白蘋紅蓼鋪鏡面鷺鷥飛起蘆花洲亂
山朶朶列檻外長江匹練遙相兜金焦蠹起如怒
浪青蓮對擁不肯收當年獵騎喧江口左蠻右觸
嘲孫劉紫髯桑蓋竟何在但見很石眠荒丘愁來
棄去不復顧隔林纖月垂玉鈎栖鶻磔磔起山谷
松杉人立森戈矛噉童好辦京口酒一澆魄礪千

鍾休

秀水訪朱竹垞先生賦此奉贈

風雅道日微俗儒見逾小百川誰障之秀水一詩
老結想廿年餘奉教苦不早昨挂吳江颿駕湖風
嫋嫋入門書堂清圖史左右遶脫略容疎狂言旨
歎深宵武庫兵縱橫戰舌漫自掉遺文墮劫灰有
元敢搜討先生顧之笑局然欲絕倒出其家藏書
龍宮炫海寶姓氏手編纂斜行雜真草云此續百
家一代事可了

先生許以家藏
元人遺集借刊

小鳥哢檐牙桃花映翠

篠越甌泛犀液坐久日杲杲臨別意殷勤真率豁

懷抱後會約重三吳城花更好探奇辨金石吟苦
追郊島先生儻來過草堂話清醪

過西興

青山當我前大江動我後春風吹客衣白雲落我
手板輿才尺許端坐疑掣肘三里一茶亭石闌分
左右肩輿置其上安若在科臼遙望炊煙青毳毳
燕拂柳僕夫如健犢兩腳笑狂走隔樹颺酒帘請
君沽一斗

望蕭山

牛車涉畏途板輿疾如矢入舟更三番游興殊未

已樟楓皆合抱瘦影落野水雲開見青山白鳥下
清泚一望真蕭然氣象乃有此緬懷無餘孫敗衄
集營壘仰瞻已廿年吳亡始誅誣江淮空橫行霸
業今已矣山川固變遷林木尙芟斲舉酒酌風前
船頭暮煙紫

峽山行

并序

先考功令山陰時鼎革初定山賊竊發民不聊
生而峽山一村尤盜藪也上官方議勦滅先考
功馳詣武林請於巡撫蕭公以招撫自任遂從
二小吏乘扁舟至峽山直入賊營諭以禍福衆

皆感泣羅拜誓爲良民先考功書其名於籍給
以免死牌而縱之復榜窮鄉諭令自新餘黨悉
皆嚮化浹旬復命蕭公全活數萬計迄今五十
年矣峽山父老爲嗣立追述往事莫不歔歔泣
下嗣立因賦峽山行一篇凡五百有十八字歸
示子姪庶以補家乘所未逮云爾其詞曰

白波如鏡光新摩兩山雨洗青嵯峨綺紛阡陌接
衡宇峽山一村同姓何我行訪友榜村口市聲風
攪炊煙斜閭閻老幼步蹠濟太平雞犬無誼譁二
三老人向余語銜淚叙舊雙滂沱維昔順治歲在

子四海渾一收天戈妖氛餘孽聚山谷狐鳴梟噪
張爪牙槍竿纏布白帕首勦掠倉困喧官衙十家
被害九家哭僵尸積路如亂麻撞金擊柝號團練
兵民與盜誰分科茲地環山更險惡逋逃屯聚爲
巢窠羽書如電上州府官兵調發疊鼓搗昆岡火
炎焚玉石吾族噍類窮奔波賢哉吾侯來何暮莅
事三日驚傳訛侯曰此皆吾赤子縣令不救理則
那日行三百謁開府爲言若屬良民多或誑其兇
或誘餌赦之詎卽非農家一弦一矢請勿用掉三
寸舌聽凱歌親書供狀百口保甲兵手洗翻銀河

因乘扁舟從小吏波風吹帶紋如鞞旌杠刀槩森
牆堵林巒兵氣騰谿訝從吏見之正股栗吾侯氣
壯朱顏和爰召賊酋告之曰汝曹獨非人情邪紡
績耕耘各有業婦依夫壻兒隨爺奈何違性陷非
僻矜凶挾狡開呀呀撐骸刊脯就屠戮鬼村啾唧
堪咨嗟曷不從我悉歸順各安田畝閒漁蓑侯言
未終盡感泣抱頭拜舞髮鬢髻丐女死命賜之酒
投戈棄甲爭紛挐千村萬落夜聲靜水田但聽官
蝦蟇迄今相距五十年生男生女攢髻丫君看家
家大作社鑄金禱祀陳華奢宗支蕃衍誰之力君

家汪濺恩靡涯嗟余懷繻早失怙靈運述德慚么
膺偶尋山水到茲地先君厚澤真難磨合之家乘
與邑志目見奚啻百倍加援筆聊作峽山曲傳諸
子姓千秋誇

謁禹陵

神珠入夢星飛流躬乘樅橈畫九州茲山玉帛捧
萬國雲車風纛驅驂駟官德賞功錫茅土歌嘒蹈
舞甸林丘專車一骨獨後至精血化碧埋千秋君
王會計猶未畢胡顛鬢曩千丈湫苗山山頭騎龍
去回首大叫孤雲愁桐棺葦椁壙七尺相送入此

深穴幽至今松檜影森立山魃怪鳥白日游萬山
起伏勢回抱左江右海煙中兜鳥田方方纔踰笏

禹崩後天使百鳥還爲民田
至今名曰鳥田在禹廟下

菲泉活活清於油

山下有禹
井曰菲泉

門乍啓樞衣入日照繡栢迷彤髹穹碑篆文豈岫
嶺好古恨不逢陳畱

禹碑文嘉靖中從長沙嶽麓書院攜歸
刻石字奇古難辨成都楊慎謾譯之

干

官雁行象生動龍哀鋪藻縣珠旒聖心勤苦尙節
儉加以雕飾毋乃羞乖龍躍水鐵索斷風牽荇帶

梁間浮

廟中伐梅木爲梁張僧繇畫龍其上忽夜風雨飛入鑑湖
後人見梁上水草淋漓乃以鐵索鎖於後柱今已不存

窆

石疑從胚渾結古隸難以形聲求

窆石狀如秤錘上
有古隸不可讀此

皆神聖設光怪流傳奇蹟供羅菟腐儒小生窮培

掘取聒塞耳空煩憂金簡玉字墮灰劫陽明洞口
尋前修神功明德誰其似俎豆百世夫何尤魚鼈
幸免食禹力敢以蚓竅鳴相酬馮高決皆眼底闊
獨立覆鬴聊夷猶會稽山狀如覆鬴亦謂之覆鬴山試問馬遷與東野
游興亦似今番不

南鎮

揚州之鎮誰為雄永興封自開元中會稽峒堯接
雲漢羣峯如浪爭朝宗我行遶礪蹋松影萬株合
抱穿青穹虯龍無風自鳴嘯厓谷響應投碣墜蒼
顛落水翠凌亂山湓激玉聲玲瓏遙望朱薨乍光

炯粉牆丹柱藏蒙籠入門陰風嘯四壁神官鬼物
雕鏤工執笏張蓋見奇相生氣奕奕舒雙瞳庶下
何曹曰掌夢勾致鳧鳧精誠通廟前石碑云有武弁於此祈夢夢神授二方印後官

至總兵適攝他鎮得二方印與夢中無異

振衣升堂默拜禱自慚潦倒方途

窮三十頭顱已如此矻矻守死書中蟲馮神乘雲
排閭闔吉凶修短惟天工儵忽獰飈攪空谷紫赤
怪氣重重烘香爐噴煙縮菌蠢石傘障日含腫隴

香爐石傘俱峯名

長嘯一聲出廟去碧海明滅波心紅騎龍

跨鳳環珮合僊官朝罷回靈宮

鑑湖

鑑湖三百映澄鮮吸盡羣峯落野田賀監宅邊波
豔豔柳姑廟外草芊芊魚穿菰葉吞山影雀啣楊
花撲水天安得越溪如雪女新妝齊唱採紅蓮

題文南雲先生雙松圖

何人點染雙松樹乖龍舞爪驅雲霧山風謾謾翻
怒濤欲上青天畱不住前朝畫手推沈文待詔之
後今南雲能以性情寄筆墨游戲尺幅成氤氳干
丈生枝黛新埽樹底攜琴望晴昊一彈忽訝衆山
鳴迸破流泉三峽倒山南峭石看峻嶒嵌空翠篠
懸枯藤影落灣環墮飛鳥蒼顏散亂疑崩奔前秋

竺塢曾棲宿夾路龍蛇天半蠹紙上馮君乞一枝
夜聽蒼波碎茅屋

曉自上沙山莊遊白雲泉過龍門大小石屋
登天平山絕頂望湖臺至蓮花洞小憩覓路
遶澗歸次介于韻

山風破曉來葉葉響珠露初日罩薄雲峯尖故吞
吐天平蠹檐端岵嶺引余步小徑踏茶棵沙路晴
散霧松聲亂澗泉鳥族喧古墓人行宛轉橋笑指
范家圃落葉摧琅玕秋山覺寒素涓涓白雲泉一
綫溜石乳雲水兩無心何煩事鎔鑄洗眼嚙清甘

斷碑哦舊句斗起雙龍門突兀勢交互徑窄風怒
號頂削虹奔度鑿翠石屋開誰貽魏王瓠靈根託
虛無投足雲礙路可憐剩殘僧有似窟中兔捫蘿
最高頂呼吸仙翁遇湖闊青天低臺空怪石聚乍
疑寄笮橋嫋娜桔柏渡厓谷齊哈呀黠黠如欲暮
下尋蓮花洞幽香著芒屨秋風搖夫蓉木末粉新
傅相與插花歸何殊佩寶璐緩步聽細泉莫使溪
行誤

晚度小嶺由龍池遊華山松徑次介于韻

山行爽遊目窮日孤懷騁佳處雖涉獵終勝夜燭

秉杖藜陟陂陀瘦日澹幽境磴蘚當路滑亂石斜
復整鋪白映蕎麥按藍綴桔梗倦脚倚顛厓彭亨
漲蛙黽林聲敲淙琤雲勢頓勇猛風緊鳥轉疾人
喧山愈靜龍池水增波老樹浸盤瘦意行仰看山
不覺溪路永夾道列長松散亂蒼顛影褰衣踏日
光流水涵藻荇小亭晝陰沈綠色變清景鬢看寒
森森坐久衣裳冷蓮華擁絕巘倚天立頑曠影落
玉女盆搖蕩深淵靚臨流戲濯足奇句寧可省如
船藕十丈敢向太華請夜月吐豔豔于焉托幽屏
雉尾搖赤杉鴨腳落銀杏殘秋更淒涼孤影抱虛

警天池沒落日滉漾碧千頃安得上上頭決背望
諸嶺

題宋二山言學詩圖四絕 選二

攤書覓句坐匡牀杜老欣看宗武長堪笑謝家佳
子弟臨岐才賭紫羅囊

射鴨西陂用竹枝驪珠獨得緯蕭詞倩他更寫匡

廬景落月孤舟侍說詩 漫堂先生新刻說詩一卷內云庚申歲舟泊鄱湖月夜望匡廬與山言共作詩話

題曹希文同年我與我周旋圖三首 禹鴻臚尚基寫照

影責陶淵明頭憎秦子羽何如圖畫中兩兩自相
許

達人思遺蛻茫茫患有身卻怪鴻臚筆添他一个
人

點染爭疑似鬢蒼各有神家人笑相問畢竟是誰
真

登香爐峯

去年遊山陰薄暮過石屋香爐峯未登悵惘惟此
獨今來值春晴僧房借筇竹飛步凌巔巖絕頂勢
一蹴古洞開豁訝翠屏交起伏剝落石髓乾颼颼
景颺肅欲前若猱升乍退等蜩縮身小如一粟顧
影叫僮僕猶懷蘇門嘯恥作華山哭發興上石梁

萬丈見林麓雙厓劈鬼斧一罅通地軸騰身入其中
中云是南天竺豆登視羣山甕盎失衆瀆雲門青
數點鑑湖白一曲頓忘登陟勞第恨賦歸速越中
吾舊遊佳處行已熟此來補未曾後遊期再續手
招白雲前且投巖際宿

發嚴州聞畫舂

綠葉沈沈春滿枝四山風靜落花遲沿溪日午行人
絕一帶松陰叫畫舂

江郎山

晴雲擘絮拖煙嵐一峯筆卓通蔚藍行行漸見畫

霧卷雙峯倒挂碧玉簪須臾中間復迸破石縫斧
劈青光涵蒼翠隱隱變紫赤仰視天半峯成三肩
輿回脰叫奇絕神物幻影人工慙江郎兄弟此學
仙仙成化石非虛談巨靈鼉所不到千年鼎峙
齊彭聃往聞行人過此者陰氣晦昧垂鬢髮鳥道
峻嶒通虎穴青壁無路難窮探我今浪遊出其下
快覩曉鏡開塵函分如螺黛插畫障合如金碧圍
僧龕浙東山色已看盡閩嶠遊興方沈酣多謝山
靈知客意清暉半日寧嫌貪忽見山坳雲潑墨怪
鳥揆影投澄潭霹靂一聲山鬼泣四山風雨鳴樟

楠

四月三日度仙霞關

閩海地脈多峰巒萬山爛熳奔中原
砦然截斷羅刹水四扇突兀開雄關
琉球日本使絡繹東甌南粵人蹒跚
荔支末利爭赴市江珧牡礪來輪官一
夫當關按劍立百萬鐵騎心膽寒
唯天設險表萬國正器豈許庸夫干
我從窰嶺上帶嶮時節正屈春光殘
樟松合抱挺百尺白石徧插青琅玕
幽叢蔭鬱百鳥聚啁啾似懼彈金丸
山花無名開絕壁一枝露冷零溥溥
紅如丹砂白如雪黃紫照耀成

斑斕竹雞大喚走木客野猿上樹干
回盤行來絕頂踞關口此日恍在蓬萊
看金銀宮闕散異彩鞭鸞咎鳳聲珊珊
俯視原疇平若掌江海一氣雲天寬
衆峯起伏如怒浪前後左右皆兒孫
坳中陡起一片白黑風颯颯煙瀰漫
阿香推車響腳底跳珠亂迸黃河翻
飛流千丈分百道下注龍井增波瀾
渾渾沌沌震玄窞水石拮隔何時乾
僕夫下嶺如健犢小竿羊牯同嘖嘖
小竿羊牯皆嶺名吳山越水足迹徧
未若此境誇雄觀盪胸決背渺何許
襟懷始笑吾儒酸筆底光芒射六合
南遊好愜平生歡

夜宿漁梁嶺下畱題店壁

三日崎嶇嶺身如行脚僧山風鳴急雨野店暗孤
燈病退榮華澹窮來道路增新詩破岑寂浣壁我
何曾

清流船歌

清流小船如矮屋箬篷三間兩間禿一立船頭一
船尾四人執槳速於鬼小灘纔過大灘橫欲欲駭
浪攢劍鋸金梭撇烈走石縫性命瞬息鴻毛輕夜
泊焚香具酒肉梢工喃喃向空祝水怪龍神在左
右寂寂無聲但搖手明朝又是惡灘來請君慎莫

多開口

彌陀灘

船頭水怪奔船後潛蛟吼巨石森我左白波噴我
右輕舟如飛梭中容一線溜榜人劃水開勢與雷
霆鬪挨舵急就之鼉鼉伸頸脰欲然一聲中生死
判清晝相傳此驚灘估客屢傾覆禪家指迷途蓮
花工刻鏤雙柱立中央呼吸金石奏回思下灘時
雙瞳矚前後相距一髮間避險如避臭三老猶色
變而况僮僕陋南來山水鄉到處堪宿畱垂堂尙
有箴何事建溪走平地波瀾興禍福巧相湊足迹

皆宿緣平生藉天佑日午惡風恬城近驚鷄收且
看石上鳥浴浪正褰囑

黯淡灘

瘦日搖晶光陰風吹沉瀨舟行黯澹灘頓覺宇宙
隘軒然大波來巍峨擁山砦橫從互舂撞白浪喧
百派初如戰鋒交萬馬脫營寨歟若刀槍陳奔竄
格鬪敗恨無據水飛那得裂皆噲仰恐天柱折俯
愁地軸壞伊余偶過此杯中一芥驚雷震耳根
飛沫溼衣袂蹉跎寄篷牕吁嗟甚矣憊半生歷險
艱心緒恬不怪富貴實浮雲惟欠詩酒債畏途漸

坦夸手足去蜂蠆飽噉荔支鮮南行聊一快

延平津

神兵百鍊霜華起殷紅血染爐中鬼一雌一雄夜
吐光怪氣騰空萬山紫茂先死去劍埋塵恨不飛
斬趙王倫胡爲見水歟變化風酸月黑延平津雙
雙玉匣空相守壯士腰間待爾久世上如今多不
平灘聲莫作蛟龍吼

五月九日初食荔支

平生未識生荔支披圖按譜長相思有如傾城乍
覲面心怡目蕩神難持我來三山已一月嘗新恒

苦歸期遲忽見將軍遣騎來二十七顆光離離時李

總戎以荔支二十七顆見餉

火實纍纍香霧溼折枝點染新臙脂手

擘奇苞紅映肉水精光透冰雪肌津津牙頰滿靈
液肝膽疑浴清涼池吾觀夏炎百果盛供人口腹
嘗不貲上林桃李八達杏迎祥池芡哀家梨楊梅
微酸青梅苦枇杷核裏黃金皮豈如此種海隅獨
論色香味皆相宜或言興化品第一飽噉可惜非
其時綠衣勝畫名字好山丹早熟姑試之綠衣勝畫山丹並荔
子又言福州西禪寺千枝照耀方離披行將襍被
宿樹下銀礫閃閃搖晨曦帶露摘來甜勝蜜傍人

任笑吳儂癡

自題噉荔圖十絕選四

君謨譜上聞名久白傅圖中覓本栽攢劍山光沸
鼎水此行只爲荔支來

櫻桃難諱流鶯破橄欖終須回味甜何似將軍大
樹下玻璃碧椀蘸紅鹽

野岬江蒲側處同色香味變杜園空少陵但飽夔
涪種漫說酸甜論未公

吾鄉百果正紅酣比到楊梅尙不堪一樹貌將圖
畫去好傳風韻在江南

自雙溪口出建陽道中得四絕句

選三

篙遲纜緩路透迤雲出雲歸日日奇觸熱不嫌飛
雨數近山翻愛上灘遲

清淺溪頭亂石危孤舟拍岸任風吹鷓鴣滿樹無
人到苦竹蕭蕭日落時

建陽山色映斜曛古木千章拂夏雲夜夢不曾離
九曲憑誰先報武夸君

六月四日晚泊武夸山下步遊沖佑萬年宮
峰峰半斜陽歸雲認邨塢樵人茶棵語寒煙破宿
莽小徑陰森森松梢泫殘雨石橋跨碧溪清淺露

尺土振衣入洞天山靜喬柯古神像肅清高穹牌
立兩廡緬懷武夸君仙成蛻毛羽崔巍大王峯撐
空作天柱下臨九曲溪羣巒爭佐輔鸞鳳翔靈宮
環珮作官府山蟬噪深樾權歌喧隔浦恍疑遇洪
厓拍肩共摩拊莫言人世隔歸路只數武三十六
點青支筇半可數

六日舟入武夸自一曲至六曲六首

宿聞武夸好來遊恨不早突見大王峰崔翠倚晴
昊擎舟逆浪花宛轉恣搜討水清石磊磊松根媚
瑤草側徑通靈宮樟楓半合抱碧瓦朱甍間雲氣

漲城堡幔亭曲已終曾孫今又老猶餘虹橋版巖
隙插焚燎佳境初噉蔗奇異便驚倒遙指玉女峯
撥擢入仙島

玉女何亭亭隔水招我前新妝臨鏡臺三髻增嬋
娟久斷陽臺夢來尋十三仙取徑止止菴琅玕動
碧鮮小犬穿花吠引入藥臼邊猛虎嘯暗谷哀猿
啼遠天鐵色積疊嶂水光照晴川一步換一景舉
目堪流連回觀萬年宮漠漠凝生煙灘聲咽危石
峯影落釣船

峻嶒小藏峯石色倚天紫上有兩仙船隱隱蘄巖

裏相傳自堯年浮來爲洪水風雨積斷紋冰雪淨
洗髓有力不能負千載棄置此水樂奏鏗鏘金石
震雙耳來舟疾如梭去舟薄如紙三杯水石間欲
止不得止仙機正軋軋空壁豔花蕊安得借浮槎
天半乘風起

雲拖山腰長浪搖壁面窄舉頭望青天不知幾千
尺上有金雞鳴哢嚙響空隙下有毒龍臥腥羶起
窟宅扁舟到峯下始見一水白中有小九曲嵌竇
藏幽僻烹茶坐樹根題詩拂苔石隔水御茶園炊
煙亂阡陌喊山臺已荒仙井想陳迹嗟嗟蔡與丁

作法竟何益

羣峰自北來風日散佳麗溪光夾山色翠碧兩交
替中道平林渡地脈蓄精銳突兀起一峰凌轢衆
山勢玉華蒼松蟠接筍孤雲細中爲大隱屏紫陽
結深契精舍數十間書齋徹天際晚山相對愁作
者誰其繼更衣自飄飄天柱空迢遞不聞鐵笛聲
唯餘蟬嘒嘒

窮厓萬仞餘光瑩霜斧劈誰展擎天手空中撐半
壁摻摻指爪痕露珠光的皜上聳天遊峰羣仙展
良覲我行六曲中身如脫羈勒長嘯落空谷松風

和寥闋天壺與鼓子兩峰青歷歷星邨數百家晚
煙正冪冪倦遊宿層巔駑馬還戀櫪且畱不盡溪
明晨恣搜剔

望接筍峯

朝遊萬年宮莫宿天遊觀羣峰繞曲溪一日千萬
變縱目神飛揚有口那能贊不須秉燭遊佳處已
得半惟有接筍峰青壁蹊徑斷紫翠立磔卓通透
光三段昨晚進石門深塢斜陽慢望厓不能前頸
脰屢顧盼今晨扶筇來露草珠璀璨古洞翠毛零
葛藤恣蔓延鼯鼬上樹窺猿狖隔林喚忽見道士

來笑口指山畔云此通隱屏絕頂有道院簫管雲
中聞環珮月下見梯級八十一才于跨兩骸梯窮
面峭壁窳宰凌朽棧蹉踣一足行鐵索雙手換雞
胸行蟻伏龍脊妖鼠顫頰臨萬丈潭鏗訇走匹練
雖有賁育儔下覷雜花眩師徒住此峰往來百千
徧雨過躡屐登不翅平地便君身長吳鄉丘壑類
平行亮無凌風翼對此空眷眷余聞道士言驚汗
溼衣襟羊腸九折坂王陽尚與歎韓子最姦黠遺
書華陰縣髮膚敢毀傷淵冰早兢戰茲遊雖好奇
何自取驚惋舉手謝道士我行亦已倦寄語峰頭

人白雲好娛玩乞我辟穀方金丹煉九轉服食待
身輕還來振羽翰

小九曲夜坐二首

屋小翠竹藏溪灣碧水住四山影蒼蒼明月挂高
樹邨釀成孤斟空階泣微露孤舟夜無人清光滿
野渡

驚風從北來刁刁震林木悠然微雨過石竇滴寒
玉虛閣生妙香可以慰幽獨枕簟涼如秋身抱白
雲宿

望郎回

在大安驛有石形如婦人攜
一穉子立山上名望郎回

望郎回望郎回朝朝望郎郎不回孤兒三尺形單
影隻冬愁風酸夏愁日赤南山雲連北山雨一樣
人間兩樣土望郎回幾時來東海會有西歸水妾
作石人甘爛死

紅花埠店壁次湯翰林西厓韻

驅車行古道南北望中收山色開齊地河光沒楚
州斷雲橫野徑小雨入溪流柿葉聲蕭瑟高吟待
好秋

新泰道中

滿眼青山緩緩行涼颼吹鬢馬蹄輕棗花香裏濃

陰合愛聽黃鸝第一聲

雄縣懷古

趙北燕南戰鬪迷嚴城如鐵斷雲梯只今衰草荒
原外野鳥啼殘牧馬嘶

題座主慈谿姜先生遺跡

蕭蕭白髮拜明君館閣爭推王右軍公論僅存
朝野合交情每恨死生分空餘殘墨光如漆想見
揮毫勢若雲只有門生知此意兩行清淚滴遺文
司寇新城王先生從都門寓書見存云將有

精華錄之刻喜而賦四絕句

選二

疎雨微雲佳句難詩家本色耐人看爾來一變韓
蘇派誰得洪爐九轉丹

商丘好事新篇滿秀水刪詩老眼明近日吳中盛
風雅還教虛席待新城

十二月十九日商丘公以東坡先生生日懸
像小滄浪率馮山公汪武曹右衡張日容天
申韓祖語吳荆山令子山言及余拜祝因成
長歌一章余亦繼作

東坡先生丙子生追數景祐百過七後來知己得
商丘雪裏衙齋作生日堂上高懸笠屐圖竹石行

書皆第一花豬切片隨風飛羔兒雪酒甜如蜜玉
椀磁甌任意陳青子纍纍映綠橘笑謂諸生興頗
饒吳人好事應傳述當年殘臘在元豐赤壁磯邊
載酒出孤鶴南飛新曲工穿雲裂石聲蕭瑟祇道
生前能好奇誰知異代波橫溢雪堂漫堂爭鬪巧
東坡西陂兩相匹吳興舊本廢重樵小生名得垂
鴻筆筵前授簡聳吟肩凍語不嫌詞樸質精英仿
彿落滄浪紙上須看動斗室若還解得遙稱壽甘
片雲腴報可必

東坡生日王郎以詩見
慶答詩寄茶二十一片

二月朔日查山探梅集六浮閣分得佳字

湖風吹樹杪香雪漫天街行盡山水窟乃知此地
佳六浮本檀園查山闢庭階美名喧一時棟宇誰
安排餘韻得張子於焉置山齋寒濤日洶凜金石
聲和諧波心蠹亂峰倒影雲根埋最愛一角秀小
鳥鳴啾啾萬枝斜復整山巔映水涯而况來詩翁
謂竹垞先生典則供樵楷餘子亦郊島險韻爭詩牌彭觥
扣拄杖蹒跚蹋青鞋肩輿轉籬落步步花前偕天
公特放晴吉日不用差坐久嫩寒入山坳卷風霾
落英點春袂細雨霑陳芟列炬返石樓拳跼攀蒼
厓禪房獨秉筆紀勝聊開懷

靈隱寺

高峰勢插天北有青蓮舍石橋俯碧溪澗草青可
藉入門寒颼颺蔭鬱類長夏江聲走雲根湖光流
樹罅倚歟梵王宮仙居誰與亞靈隱山一名仙居魚鱗排屋
檐蘚磴任凌跨佛殿做以宏講堂清且暇徐行入
佳境悠然如噉蔗穿厨繞曲房石上寒溜瀉山春
草木香嵐氣爭變化巖半一聲鐘飛墮石梁下

韜光菴

竹風吹遊人山行正幽絕叢深不見天但覺雲氣
結新梢影森森絕澗聲泱泱連筒各灌注引泉來

曲折倦脚倚石闌徑仄頗疲茶僧寮八九間攀緣
上帶嶮羅刹浪拍天呼吸見凹凸龕赭鎮海門對
峙如雙碣獨有西子湖一勺自澄澈清光互掩映
好景恣羅列卓錫者何人遇天漫饒舌
唐時韜光禪師從蜀出遊其師
囑曰遇天可前逢巢卽止後至靈隱巢溝
鳩值白樂天守郡因悟師語遂卓錫焉紅薑與青芥非復舊
時設我來已四番陳迹慨前喆愛此金蓮池涓涓
流不竭坐久山禽喧修篁韻更迭寒籟滿林飛斜
陽半明滅

冷泉亭

龍泓裹細雲玉乳滴寒井泠泠石上聲韻入松風

永灣濃見鳥飛倒沒青天影孤亭倚空明橫側浸
諸嶺我來面山坐清暉變俄頃娟娟桃李叢乃復
得此境石門噴亂沫杉篁散清景日下清繞橋墻
影挂炯炯

飛來峰

胡爲靈鷲峰夜半生羽翼劈開青芙蓉落向北山
北廣袤透玲瓏下上聳削方怪石驟馬形老樹奇
鬼色秃尖兔筆卓攢芒龍劍植泡洩玉乳甘黯黥
野雲黑陟顛覺天低入洞駭路塞回觀冷泉亭淥
淨深莫測銀濤漲嵌竇坤軸任欹側苦恨青壁間

佛像漫剝刻翠毛點師象風雨半剝蝕何年鏟削
平穢迹埽髡賊石上佛像爲元僧
楊璉真伽所鐫落日挂松頂峰巒變
奇特取徑入蒼煙好尋天竺國

天竺寺

天竺氣鴻濛香篆盤太空宛轉疑徑斷忽聞花裏
鐘沿崖過華闕回溪撼松風斷霞擘薄絮落日懸
青銅朱薨隱山坳金碧新磨礧白衣高堂坐寶幢
颺簾櫳農夫攜邨媪蹒跚進鞠躬緬懷辨才師結
廬此高峰山容悅春鳥神光映穹窿麥黃蠶老句
風韻傳坡翁披尋肅儀亭但見荆棘叢白雲封梵

杳茫茫失遺蹤

宋僧辨才建肅儀亭於寺門
外今廢惟寺中白雲堂尙存

葛嶺

峒峒初陽臺長風振寥廓溪聲灑飛雨白練天半
落梅石蒼藤纏赤壁巨斧削嶺半有梅石
赤壁二菴枯竹嘯幽

禽野花媚靈藥相傳抱朴子修真此焉託至今畱

丹井空洞試一勺仙成跨鶴遊洞口雲漠漠湖上

有平章山林塗粉牖一曲占西湖天書表秋壑峰

坳亂燈火璫樓掩珠箔乾坤難擔擔空打七州錯

吳山王氣沈遺恨滿城郭空令弔古者到此每羞

忤誰似葛翁墓今古寄林薄陳迹想廢興莫煙生

竹閣下嶺繞湖歸此興殊不惡

紫雲洞

明月香風宵一刻丞相畱春畱不得昆刀夜半劈
棲霞移來洞裏青山色掘雲翦月開豁豁立如巨
象蹲如蛙珊瑚敲碎流脂赤細末觸石生琪花暢
鑰雙亭絆荆杞百丈陰森寂於水木棉花下游鳧
歸鵲鷗石縫呼山鬼

玉泉寺

玉泉何泓澄微風動嫋嫋噉魚干頭撥刺破昏
曉須臾浮紅黃倏忽變青縹搖扇口亂吹投餌尾

爭掉喑影雲去疾吞波月出皎浮沈寄深淨游泳
雜大小勿謂魚無知此樂良不少我來坐泉亭放
目正眇眇宛在濠梁間逍遙萬象表胡爲百年身
塵事日憧擾憑闌試靜觀中心獨悄悄

過天章寺

春風曾識舊蘭亭玉雁珠鳧鬼火熒澗水可能尋
楔帖山禽還是哭冬青龍蛇健筆消灰劫鐘鼓殘
聲答地靈白髮老僧年八十興亡滿眼不堪聽

遊宛委山尋陽明洞遇土人指示飛來石詩
以紀之

嘗聞會稽山有峰曰石簣洞天第十一陽明特神
異云此卽禹穴金簡表天瑞憶昔太史遷探奇造
幽邃或言禹陵非或疑禹井僞紀載多荒唐流傳
失所自越人鮮好古韓公發深喟我來泛若邪山
風壯遊戲一徑入蒙茸厓深疊寒翠斷澗滴瓏玲
絕壁糝紅膩瘦日懸孤光閃閃向空墜撇烈騰麕
麕啁啾嘯魑魅雲開但見山獨行心惴惴回步問
樵夫腰鎌笑相議此是宛委山猛虎所窺伺荒邨
八九家家受驚悸前宵檜突入一逞爪牙利哀
哀寡婦聲隔屋泣雙淚今君雖好奇何事蹋險地

山間飛來石一拳好位置相傳安息來枯藤絆芒
刺皴炮漲腹蛙連蹠塞尾蝓鳴蕭馬絡頭呼牟牛
穿鼻模糊鐵索痕錯落星哆侈洗眼重摩挲略辨
慶曆字旁通小有天髣髴與甄坳泓古窪尊何
代列竅識元公昔投簡高唱誰其享小儒仰風流
搜腸罕佳思回思迷路時噤痒出吁戲蘄巖真畏
途性命輕一試樵夫從何來毋乃神物使蒼茫龍
瑞宮千年見成毀福地得淹畱勝遊偶然遂決背
望香爐抽身啓玉笥唵成雜驚喜歸用詫同志

雲門山

少時因讀老杜詩若邪溪畔思一至今今年因作越
中遊青鞵親蹋雲門寺初從放櫂出郭門鴨頭綠
水春容媚魚邨野店宛轉通一條石路穿幽邃千
山萬水插天出近者紫赤遠者翠嵐氣空濛撲袂
寒絕壁松濤喧鼓吹七曲八曲環溪流銜花鳥墮
浮紅膩路窮澗斷渡竹橋漠漠溼煙輕雨灑無數
幽篁遮曙光浙瀝一聲金滿地風葉翻翻逐亂雲
露梢點點含新淚叢邊取徑入招提茅齋八九多
佳致方丈僧閒雀亦馴衣桁爭投解人意五雲山
一培塿耳智永筆冢何纍纍此中本是一山門更

名廣孝稱靈異顯聖壽聖與雍熙當年爲四今爲

二神筆猶存南宋朝

宋高宗書傳忠廣
孝之寺六字碑

放翁文詞道園

記 陸游有壽聖院記
虞集有雲門寺記

我來差勝秉燭遊去如避臭心滋

媿日落未落峰影合回頭暝色迷雙背出門一笑
宿願酬竹筏乘流信風駛

登臥龍山

何年驅祖龍夜半聲窸窣天矯壓空城江海兩蕩
瀾緬維元使君重鎮羅斧鉞四山對翠屏煙雲助
落筆繼者蔣程吳

宋蔣吏部堂程給事公闢
吳給事某先後來守此土

方軌猶未失

閔山詩蒼涼草木記真率

蔣有閔山詩
吳有草木記

紫茶森旗槍

碧篠蔭蒙密樵蘇往有禁索葦間門草佳名數百
年東州誰與匹我來訪郡侯探奇上嶒翠溝塍如
錯綺氤氳萬家溢時當春之殘行徑草芽茁濃陰
鳥關關松花撲裾褱孤亭倚岡脊乍到寒凜慄干
巖萬壑間紫翠來繞邳颶風何處來海氣黑如漆
迸破赤玉盤閃閃浴紅日怪石何嵌空云是古幽
室潮頭齧髑髏傳疑未可必題名漢唐人約畧辨
什一摩挲坐其下自未將及戊因思守土者章服
講法律夜則擁牘眠日則清道出鑠鑰徧重門泥
香語風馭何嘗載酒殺于焉散書帙徒傳長慶詩

好事作口實我今憩蓬萊好景得盡悉山靈愜夙
緣佳致自超軼收拾鏡湖春遊興可以畢

三月十三夜邀竹垞先生同馮文子吳寶崖

周層巖泛舟西湖看月得六言四絕

選二

溜水橋邊扶杖屯霞石上攜琴載得詩翁酒客一
篙撐入湖心

白傅詩看草綠米家畫想煙橫失卻南屏山腳白
雲堆裏鐘聲

讀元史八首

選四

中原皇綱失宗社如山崩詩書遭兵燹滅沒無一

存偉哉姚公茂絕學能相承軍中來江漢實許號
得朋讀書鳴琴下賢聖接寐興寶劍抉浮雲手扶
日月升經學唱西北文物得未曾茫茫六合內獨
讓斯人能

黃帝哀鼎湖漢文迎代邸沙漠有大兄固讓誠得
體車駕次和寧青宮拜玉陛須臾行帳中僕御聞
出涕燭影斧聲疑當時被訶詆挾壘上馬馳物議
恐難洗史氏多忌諱紀事只大氏獨有薩經歷諷
刺中肯綮游魂灑淚詩千載笑兄弟

周室憫黍離蜀臣悲杜宇吁嗟彼王孫甘心事仇

鹵死媿文丞相生慚謝皋羽書畫雖絕倫大節吾
不取賢哉彝齋翁高風掃千古遇弟輒生嗔到門
必見侮吾愛水仙圖寶爲翰墨祖

文章開魯姚元氣尙團結天曆置奎章作者首虞
揭金華接踵興儒林推四傑爲學務根柢行文淨
冰雪古藻揚清光煌煌照碑碣一代制作手小儒
盡咋舌同時惟歐陽瓣香乃祖烈後來宋太史猶
承黃柳訣斯文如江河源遠流不竭猗歟百年間
生才竟殊絕

讀洞庭吳烈婦施氏遺詩

并序

施氏吳之洞庭山人歸於吳年二十四而夫逝
姑屢命改適不從越四載立族子爲嗣爰作絕
命詞一首以綿繚自縊死

絕命詞終山鬼呼可憐薄命遇嚴姑四年血淚知
多少盡逐西風入太湖

擬白香山樂府四首

城西嫗

城西路上風蕭蕭攔街痛哭聲號啣就中一嫗聲
更哀上前問哭緣何來官司誤傳點繡女家家婚
嫁不擇主爆竹終宵響遏天輿馬喧闐無空土我

女閨中十五年者如柳葉顏如蓮息忙錯信東家
女細馬馱歸紅錦纏入門結髮堂上坐鄰下兩兒
年已大側目追隨婢妾班夜抱衾裯和月臥可憐
嬌養蕙蘭質忍淚吞聲從此畢聽嫗言且勿哭君
不見趙家女年十六昨宵花燭照顏色夫壻今朝
作八十

關中民

關中三年旱風起大麥焦黃小麥死兒哭耶孃妻
覓夫雜沓饑民如集市官家蠲租詔發棠煮糜調
粥療飢腸長吏公私多扣刻一斗止合三升糧攜

囊挈餅爭領牒口飢打手踵相接縣官三日不開
倉十人八九僵路傍

煮鹽商

煮鹽商銀鞍鑿蹠出紫韁前驅呼喝行人立黃羅
繖影隨風揚本是西門大賈客輸粟官高二千石
父授皇封子部曹門楣不數金張宅可憐南國有
詩翁蠹魚老死破簾中敗壁酸風衣百結半生莫
送一身窮乃知讀書縱使五車熟不敵黃金滿一
斛

賣柴翁

賣柴老翁六十六旁行僂頭髮禿閣閣柳聲孤
燭搖帶絮披氈蹲矮屋自言今年田稻歉秋成遂
使陸梁小醜黃昏行大官嚴令申保甲柵門漆置
魚鱗接西山日落斷行人當街不敢收鵝鴨前夜
街西火焱流昨宵羣嘯城南樓倒騎屋山入閨閣
珍珠玳瑁落臂鞦長街寂靜月如水十五五公
然遊金吾兜牟舞駿馬劈面驚回伏鞍下須臾賊
退始張威攔街呼喝平民打打平民莫敢陳嚴夜
禁立法新老翁無嫗又無孫里正驅來守柵門三
十青銅博一夜更長頭眩目昏昏近聞官兵號令

肅冀得下鄉殲鼠族安排布被折鐺邊一覺瞢騰
眠破屋

江左十五子詩選卷九

江左十五子詩選卷十目次

商丘宋 犖牧仲選

毘陵邵長蘅子湘訂
商丘宋 致穉佳校

李必恒

詠史二十首 選四

月上

謁浮山禹廟次昌黎石鼓韻作歌

書樊南詩集後五首 選一

江泊

方正學先生祠

前明宮詞三十首 選十一

詠懷古蹟八首 有序 選六

三阿
文游臺
嵇莊

下河溪
珠湖
英烈夫人墓

民夫篇

雪獅歌

天王寺吳道子觀音畫像歌

光孝院禮唐佛述老僧語作歌

次日雪再次陳檢討六月韻戲東同席諸

公

乙丑紀災詩八首有序

羅大玉行移居時堡若有不釋然者作詩

以道其行二首選一

月下別羅大

讀陋軒詩

冬暖行效劉誠意

悼亡詩十首有序
選三

涼夕

文姬歸漢圖

效荆公烘蝨有序

清明郊行

溪邊四截句選三

洗竹

短歌送賈九儀入都

讀臨川集跋其後

宿湖上聞漁歌其聲娓娓可聽而詞特鄙

俚爲櫜括其意作六絕亦古竹枝之遺

也選四

詠雪用歐公聚星堂體

除夕雜感疊前韻東樊桐仍索和章

題樊桐近詩後即效其體二首選一

同學諸子招入文社不赴長歌述懷并謝

諸子

水後春食不繼家人采野菜雜之粟米中

作供余亦欣然一飽作詩示兒簡三首

蕪菁

馬蘭

枸杞苗

讀劍南集感賦六首選二

讀史十首選二

大愷饒歌鼓吹曲十二章并序

聖武
役者謳

從軍樂
歸化城

神泉出
征馬肥

永清碑
破陣樂

釋纍俘
大愷

回鑾曲
獻賀觴

廣陵旅次喜晤顧十一俠君長歌奉贈即

送之歸吳門

上宋中丞漫堂先生五言古詩一百六十

韻
虎丘次清遠道士韻

古風一首賦謝漫堂先生

漫堂先生打魚滄浪歸以饗客恒叨陪座

末即席賦呈一首

西洋繡毬花二十韻應漫堂先生命

勵志詩四首

選二

苦雨詩呈漫堂先生

長夏漫堂先生出所藏古繪事法書見示

因呈長句明日將渡江之吳陵

吳門徐昭法先生畫芝

謁露筋祠

送漫堂先生奉命會勘下河濬海口故

道

秋懷詩

有序

題宋山言學詩圖

題王石谷騎牛歸田圖

贈毘陵邵子湘先生

有序

石谷爲予畫魚川書屋圖口占二絕報之

感春五首效昌黎卽用其韻

補吳趨吟二首

引

幼伶
濫刻

石頭城

真州資福寺秋日雜詩八首

選二

詠物六首

有序
選五

腐羹
醃菹

醉蟹
火米

炒豆

江左十五子詩選卷十目次

江左十五子詩選卷十

李必恒

百藥一字北岳高郵人著
有三十六湖草堂詩集

詠史二十首

選四

漢兵敗睢水阿翁遭楚畱口舌仗侯公始免俎上
憂天子必有父薄祿詎足酬蕭曹微功耳雍齒亦
且侯當時漢廷上但賞鄂千秋

武帝好儒術朱嚴晚見誅達哉惟馬卿引身恒家
居作賦驚天子彈琴來名姝仕宦若噉炙適口良
已腴從容進退間一病安可無

方朔仕漢廷事道非玩世時時一諷諫彼自敬其

事叩頭誅董偃凜凜直臣義豈得以詼諧目之曰
遊戲

文成甫伏誅五利復親屬爵祿尚可捐何至棄骨
肉天子而神仙人苦不知足汲黯言誠戇陛下內
多欲

月上

月上微風起飄飄吹素林草蟲浮夕響木葉識秋
心涼氣湖中水砧聲空外音不知孤館客此際感
何深

謁浮山禹廟次昌黎石鼓韻作歌

用韻詩須胸有成竹
以意為主而以韻從之
則無趨韻之病矣若此
篇敘事議論一氣呵成
若自己用韻者然中有
大力量在

粵若稽古帝堯世光華復旦卿雲歌滔天獨恣河
伯怒帝曰四岳咨如何九載隳績羽山殛黃熊碧
血膏霜戈惟鯀有子子曰禹負罪飲泣爭濯磨行
山表木敷五土大地碁置如星羅首疏濟潔定冀
域導南條水先岷峨舟車繹絡紛水陸橈樁雜沓
周陵阿支祁夜鎖縛奇相百靈炯炯誰敢呵九河
既道九原滌枝分派析無舛訛濁水綠字著神怪
穴中金簡書蚪蚪鼎塗百物禦魍魎驅使鮫鱓馴
龜鼉蟻珠璆琳貢銀鏤鉛松篠蕩浮青柯土功荒
度錯昏晝跋烏八載同擲梭東漸西被朔南暨手

併足胝難委蛇。呱呱門內弗暇子。塗山灑泣同湘娥。元圭載錫幹厥蠱。黃龍呈瑞江之沱。烝民乃粒玉帛會。萬國輻輳車書和。厥田維上中下錯。總銓秭粟開輸科。淮海維揚古澤國。昏墊實維東南多。舊傳浮山此作鎮。崩劣巋巋神鼇駝。或云一拳實中繫。其下滾滾洪濤過。或云媧皇煉餘石。巨靈斧擘同切磋。又云蛟龍性險怪。制以鑛鐵沈諸波。頂露一丈其色墨。平砥如掌無偏頗。由來神物歷年久。溯源那復知其他。楚俗紛紛競淫祀。蛇神牛鬼爭媿媿。數椽冷落傍闌闌。空餘盛蹟誰摩挲。我來

再拜瞻黻冕。俯仰四矚生悲哦。壞廊風吹舞鴨腳。麗牲有石誰刑鵞。山根斑駁苔蘚蝕。清泉朝汲唯禪那。吁嗟下士抱微尚。利濟無術心丘軻。負薪沈璧戴君相。會見注海行江河。緬思禹功纘明德。分陰用惜毋蹉跎。

書樊南詩集後五首

選一

隸事爭嘲獺。祭魚琢磨須自有工夫。時人縱效西崑體。解道韓碑一字無。

江泊

箬葉篷鳴雨。枯樁纜繫船。淡黃初夜月。深黑一江

烟樹近微生影村荒不市鮮行厨供具絕風味轉
蕭然

方正學先生祠

烽烟一夕逼南畿痛絕孤臣淚血揮十族可堪同
蔓草時戮建文諸臣謂之瓜蔓抄九重亦自愧麻衣金川燕子飛還
出玉壘龍孫去不歸祠宇高皇幸鄰近一坏鍾阜
共斜暉

前明宮詞三十首 選十一

西僧迎到法王封白鶴金仙現滿空昨夜御前頒
佛曲朝來唱遍六宮中

玉户金鋪次第開大家侵早視朝回琲珠一例齊

頒賜太監西洋進寶來 永樂

瓊華島畔颺微風金露亭開對玉虹月下洞簫聲

起處君王真在廣寒宮 萬歲山有廣寒殿宣宗自為記 宣德

晝漏深沈睡起遲帳中吃吃語昭儀黃金小合菱

花樣秘術新呈萬少師 成化

宣府由來是帝家掖庭長日靜羊車君王豈是無

情識不愛宮花愛野花 野花偏有艷武宗詞語也

威武營開七校連玉簪盟重亦前緣縱然身得長

門入黑殿淒涼也可憐 武宗載劉良女入宮居騰禧殿殿覆以黑瓦時謂之黑婆娘殿 正德

二八鴉鬟玉不如高元名殿侍直傍宸居醮壇日永
無宣喚間按瑤笙學步虛

邠風亭子未央傍蠶室新開典禮詳詔出內庭先
演習中宮不日幸條桑嘉靖

寵固君心自不移坤寧名宮日夕奉恩私同心別有

山河誓不比驪山夜語時萬曆

內旨朝朝出聖嬈御舟嬉戲自持篙月華門畔車

如水枉使中宮讀趙高天啓

排當盡撤御前供披閱親勞午夜中一自河南淪

沒後翠華不到玉熙宮崇禎

詠懷古蹟八首選六

郵中舊傳八景率俚語耳暇日偶繙邑乘摘事
之載在史冊卓卓可稱道者各以五字誌之學
者將欲遍覽嶽瀆搜抉其名勝筆之於書矧父
母之邦詩云惟桑與梓必恭敬止

三阿通鑑晉孝武太元四年秦將俱難彭超陷盱眙進圍三

志云三阿即北阿鎮在高郵
州城外九十里今鎮名尚存

東海大魚化阿法真雄姿晚棄景略言氣吞司馬
兒盱眙既已陷廣陵復告危桓桓謝將軍受命如
風馳奮勇卻俱彭三敗敵已靡壯猶媿方召先聲

北淮淝緬思古人意成算百不虧舉親豈弗衆屐
履任亦宜兒輩能辦賊大言亮非欺戰場今何在
蔓草畱荒基名埭近在望名埭乃謝傳
鎮廣陵時築十載同謳思

下阿溪

卽晉三阿地今溪名仍舊按唐書李敬業取潤州
會李孝逸統衆至使其弟敬猷回軍拒之屯兵下

阿溪孝逸用魏思溫火攻策敬猷兵大敗敬業走海上爲其下
所執送神都誅死初駱賓王爲敬業作討武氏檄兵敗後不知

終所

金輪奸天位龍種肆蠶食羅織大殺傷普天怨氣
積英公起揚州軍容頗烜赫聲罪而致討狐媚亦
動色豪傑爭響應師直戰必克如何取潤州戀棧
出下策遂令堂堂陣軍氣頓蕭索倉卒遘孝逸一

敗遽狼籍匡復徒虛名屠戮復誰惜我來弔遺踪
惆悵想所歷不見葭葦紅但見溪水碧智哉駱丞
超神龍竟無跡

文游臺

上有祠名四賢祀眉山蘇公軾寓賢王公鞏鄉賢
秦公觀孫公覺後燬於兵燹濟南阮亭王公公司李

揚州時
重修

梧桐生朝陽翩翩鳳鳥至惟賢斯名賢莫之致而
致淮海天下才磊落負奇氣命駕來蘇公崇丘此
焉憩孫王亦可人談笑幸相值酒酣望終古青天
照殘醉想見掀髯時崢嶸吐高議勝事近千載風
流未墜地誰云培塿卑而作喬嶽視臨川亦居停

荆公詩昔
來高郵居

遺蹟無人識懷古發長謠霜風颯清吹

珠湖

即甓社湖五湖之一也孫莘老覺嘗讀書於湖濱珠光徹天後爲龍圖閣學士直諫忤王安石不徒以科名顯

好風從東來楊柳大堤綠菰蒲芽短短鳧鷖晴出
浴扁舟郭外去波光淡和旭俛仰懷幽人結廬傍
隈隩潛姿媚孤影奇光亘天燭地靈斯人傑崛起
振芳躅豈徒科名顯直節著諫牘五湖波浩蕩望
古引遐矚漁烟青葦叢飛起雙屬玉

嵇莊

今名四義村四義者莊官嵇聳與其子德潤暨館客林希驥千里林孔時願學按綱目云遣工部侍郎柳岳如

元乞封高郵民殺之卽聳也指南錄云子自高沙至嵇家庄官嵇聳設醴甚至復遣子德潤客林願學送至泰州因得航海去明學士程公敏政有弔嵇聳辭

皇宋隕天步國勢若贅疣哀哉南朝臣衣冠而馬
牛全軀悵無策稱臣於寇讐侍郎自何來烈士僞
綢繆草堂燈燭光沽酒炙肥牛夜半呼二子若忍
見之不霍霍手磨刀起斷侍郎頭亡何丞相奔倉
皇遠相投殷勤具舟楫慷慨送他州其事雖不成
大義乃千秋嗚呼縉紳士身死名足羞豈知草澤
中姓字天壤畱一是芝與蘭一是瑜與猶

英烈夫人墓

夫人南宋時受勅封墓在今南門子城內舊有異娼廟今廢諸黃冠踞其地建上真

觀墓遂湮沒表之棹楔是在賢有司

客從西冷來侈談蘇小墳蘇小但歌舞吟詠徒紛

紛毛也本微賤失身犬羊羣紅裙金叵羅日日侍
將軍將軍乃宋臣聊與致縿縵何期詔書下將軍
意中變昨日是宋臣今日是宋賊妾奉將軍歡不
受盜賊逼將軍真盜賊聞言勃然怒白刃磔紅顏
頸血濺如雨榮名身後衰道路咸嘖嘖試問蘇小
小何如毛惜惜

民夫篇

郵俗重耕稼務本羣力田歲每至秋成菽粟如流
泉上納官家租私室亦苟完一自周橋開淮黃執
滔天沃壤蕩爲湖沮洳淪爲淵恒產旣失業難免

飢與寒秔稻來遠方粒粒如珠璣北風况怒號腹
餒衣裳單殫死道相望遺齒飽烏鳶昨日八口家
同縊今尙懸近聞販人賈云向黔與滇少女易斗
米中婦價半千亦有所嬌兒棄去無慘顏嗚呼我
聖皇田賦歷歲蠲更遣大臣來開廠賑粥饘用此
保朝夕稍稍殘喘延十月湖水平司空符檄傳鳩
工趣築堤夫從里甲編一甲派十夫兩夫派一船
流亡已過半見存自遭患里長夜捉人如火相迫
煎租稅幸荷免敢復憚胝胼但悲凍餒軀舂杵力
不堅恐遭官長怒不足勞扑鞭道逢紈袴子手足

遭拘繫此曹累九重昔富陌與阡羅綺被織體玉
指撥鷓絃生不慣畚鍤願早溝壑填更或恣欺瞞
左右相牽板吏胥肆追呼鷄犬不得安嗟哉九閭
上誰知此煩冤一旦 詔旨下惻然拯民艱金錢
自召募不在民而官老弱得休息丁壯集如雲會
見宣房塞喜氣兆豐年我聞古三征力役自應殫
用一苟緩二在昔已稱賢盡除戴 聖主隆恩曠
無前所以堯湯時水旱不爲愆史冊宜大書磬石
深琕鐫長謠效輿誦采風錄此篇

雪獅歌

元日飛霜二日霧三日大雨傾如注四日霏霏積
雪深五日六日雪不住七日八日雪更大九衢萬
井稀慶賀屣履誰同東郭行閉關祇效袁安臥兒
童跳擲何雄哉衝風疾走能千迴爬羅瓢杓倒盆
盎亂堆圭璧傾瓊瑰大兒解事尢狡獪設想經營
出儔輩隻手能司造化權逡巡貌出狻猊態首尾
尻睢恣搏弄牙爪之而歛生動疑是滄州城外蹲
恍自西洋國中貢兩目睽睽開巨口仰天直作河
東吼猙獰跋扈難久常太陽一照夫何有羣兒腰
鼓聲填填齊祝瑞雪兆豐年我聞此語重嘆息八

載沈灾指堪屈前年雪多凍餒死去年雪少又如
此即使雪兆今年豐年豐蚤已死雪中安得天公
為雨粟萬斛千箱遍山谷九州四海民鼓腹年年
無雪願亦足嗚呼年年無雪願亦足

天王寺吳道子觀音畫像歌

晉代人物推虎頭有唐道子亦罕儔下筆能令神
鬼愁刻畫毛髮窮雕鏤九工帝釋天人流衣冠秀
發森冕旒善哉大士厥像優珠璣瓔珞百寶修異
代一幅千金酬天王古寺雄一州妙蹟不知何年
畱橫披巨軸張高秋觀者雜沓填華騶而我諦視

瞪兩眸斷縑漠漠古香浮細尋筆墨如絲抽五采
間以金錯鈎意匠慘淡腕力道臨摹贗本同贅疣

我識此定非朱繇

唐朱繇臨吳道子筆
往往亂真見名畫記

僧言逞者遭劫

偷胠篋背負藏之舟歟忽四合陰雲稠震電閃爍
龍蚴蟉擺播惡浪高於丘織兒惶駭角崩求願復
其所少乃休通神墨妙信有由詎無物焉司諸幽
我囑寺僧謹藏收人謀倖免行可憂即恐丁甲恣
冥搜

光孝院禮唐佛述老僧語作歌

院為唐舉直禪師
建中有五佛師所

置也按師乃懿宗子咸通間游方抵揚以太平倉基請於朝詔以
為鎮國禪院居之後葬於院隅立浮圖五級宋元豐末發藏及隧

得函柩全骨不解聯若鈎鎖
發異光現舍利人驚異之

光孝院中銅佛五有唐咸通年中作形模渾朴色
相古奇質晶熒露斑駁我來銷夏獲瞻拜摩挲未
敢手捫摸老僧頭白頰解事娓娓從容溯顛末叶
此寺肇基實帝胄帝錫嘉名曰舉直叶師也龍子
自不凡敝屣軒冕作行腳一瓶一鉢恣游歷卓錫
乃在廣陵郭旋來茲地監刹竿像設莊嚴侈丹雘
厥後坐化鎮國院在廣陵窳堵波高聳巖壑曾聞元豐
啓函骨鎖子鈎連類纏縛復有纍纍舍利子異采
陸離光煜爚乃知師真佛化身不爾胡然著靈蹟

叶我知僧言定不妄爾時秕政吁可愕同昌已死

尙溺愛設齋飯僧動千百叶翠華臨幸安國寺佛

骨迎歸效南膜膜拜也上有好者下必甚况於家庭易

感格叶嗚呼大中以後王室衰國勢傾危累卵若

普王上殿作天子阿父唯阿僅畫諾興元成都再

播遷離披直比風中稗乾符既終太弟立紇干山

頭凍殺雀可憐椒殿一杯酒血肉模糊齒鋒鏑僖昭

二帝皆懿宗字更傷諸王一網盡披髮呼冤十六宅叶詎若

阿師早見幾高蹈遠舉天外鶴蕭然彌勒與同龕

梵唄鐘魚此間樂千年瞿曇面不壞回首唐陵一

丘貉由來繁華同逝水清淨何妨甘寂寞老僧聞
言增感歎乞我作歌著崖畧會與諸佛共永久此
言非夸吾不忤茶瓜又破一日間歸聽鳴蟬日西
落

次日雪再次陳檢討六月韻戲東同席諸公
封姨玉戲笑不歇滕六驂龍夜出沒湘娥行雨接
素袂洛妃凌波濕羅襪拋灑恍似撒珠玉颺播真
如屑麩麩地底絕無遺種蝗壁角頗多凍死蠹千
株江梅發古嶺一樹瓊花挺石闕此時裘馬年少
子作達衝寒擁豪卒激艷白傾涼州釀晶硤紅嵌

洞庭核紫螯黃雞入口鮮韭甲芹芽溜匙滑共慶
天公增好景預占豐年不憂李休輕若輩劇無賴
手板早向承明謁醉倒還憑翠袖扶夜歸那怕金
吾罰獨憐寂寞邗江客凍帆膠阻不得發落落長
疑主人慢踽踽每遭市兒訐竭來世事多變更過
去年華總漂忽諸公裁詩筆似弩何異作史字如
鉞苦吟且學呂米桶肯效袁郎凍縮窟狂來迅掃
字鴉麤破費玄都墨半笏

乙丑紀災詩序

郵自鼎革後水患之大淮爲最考淮水發源於

桐柏釋名曰淮韋也。韋繞揚州北界，東至於海。水經注曰：淮水逕義陽，東過鍾離縣，北夏丘縣，南又東至徐縣，又東盱眙縣，東至廣陵，淮浦縣會黃河而入海。此其故道也。前明廢海運，復會通河以漕東南之粟，乃修歸仁堤，大葺高堰，障全淮，使出清口，與河流會，藉淮刷黃，從雲梯關入海。以故運道不梗，而淮水亦不至爲害。鼎革以來，隄防廢壞不修，順治十六年己亥，歸仁堤決。康熙元年壬寅，又決泊，自周橋開，而淮水盡東注矣。淮水既東，清口之力遂弱，不足汰黃流。

之淤久之，雲梯關故道爲積沙壅阻，於是黃水逆入清口，奔注洪澤湖，淮復挾黃爲害。合二水，悉停蓄滙萃於高寶諸湖，而下流范公堤諸閘久廢，其入海諸港口又皆湮塞，其受無涯，其歸無所。二十年來，七邑乃爲之壑矣。乙丑夏，淮黃交漲，郵城不沒者三版，予宅在城外，水深丈餘，坐臥小樓者匝月，洫洫乎抱爲魚之恐，愁苦中輒賦一詩，得八首，非祇紀事實，以告哀夫。治其源宜，修歸仁，固高堰，殺其流，宜開支河，濬海口。今河臣於沿堤一帶，設立減水諸壩，又令每歲

增堤土三尺。噫於保堤則得矣。如水患何。畱心民瘼者。宜思所變計焉。

何年湮息壤。千里發胎簪。洪澤陂難障。淮南害獨深。尾閭原地勢。降割豈天心。十萬生人命。經旬突不黔。

報道歸仁決。須臾涌浪高。羊頭何滾滾。釜底自滔滔。草木先秋萎。魚龍竟日號。不堪容膝地。霖雨又蕭騷。

卽以城爲岫。驚濤直撼城。長湖無鳥過。六月已涼生。野哭何人急。訛言半夜驚。全家風浪裏。秉燭坐

深更。

泛宅知無計。危樓且共存。半間連榻竈。八口雜雞豚。嘔洩情懷惡。燔燒淚眼昏。皇天吾不怨。幸免作魚鼈。

藻荇牽高樹。荒村八九墟。人情爭網罟。劫運到詩書。大厦何當庇。他鄉好卜居。可憐空際鴈。無處覓沮洳。

眼見汚邪盡。高原捲亦空。療飢思聖米。

唐宣宗大中六年高郵大旱民

於官河中漉得異米號聖米禦濕覓山芎。不沒城三版。難租地一弓。

奇灾經幾見。駭絕白頭翁。

司空奉帝命。曷以拯灾黎。上策惟通漕。友聲奇勳
在護堤。歸墟迷海口。沙路塞雲梯。財賦維揚地。何
堪竟作谿。

五行多錯迕。誰與問京房。穀洛將無鬪。淮黃久失
常。禹功真不再。天變故難詳。激蕩悲風起。哀音徹
大荒。

羅大玉行移居時堡若有不釋然者作詩以

道其行二首 選一

市井厭囂甚。古人愛村居。非徒俗淳朴。亦欲藏吾
虛。我友斯決策。歸彼中田廬。地僻寡見聞。能令世

事疎茅茨八九間。中羅琴與書。弟兄互師友。此豈
不足歟。田園在屋後。雜植秔稻蔬。屢豐戴皇天。卒
歲幸有儲。比鄰新釀熟。臨流亦多魚。招呼集親串。
未厭斟酌孤。吾徒方養晦。何必高門閭。懷土古所
鄙。勿爲重踟躕。

月下別羅大

殘陽靜晚蟬。月白荳花田。之子又今夕。追歡如小
年。趁墟沽酒易。出水剝菱鮮。忽聽秋蛩語。離思共
黯然。

讀陋軒詩

東淘吳野人嗟苦效郊島崛起魚鹽中海濱知者
少我行讀其集奉持若瓌珪鈔謄失寒燠吟諷錯
昏曉長者或嗤予所見毋乃矯性情貴和平此亦
太枯槁長跪謝長者茲理本微渺同嗜有殷生

王名

嶧字樊桐同里
人有能詩聲

可為知者道

大雅久不作俗調何靡靡蚓唱與蛙鳴一倡而百
隨折楊悅里耳白雪和者希嗟予沈溺久既乃悟
其非譬彼失路子中道始得歸偽體應見裁風雅
良在茲清詩近道要少陵豈吾欺

冬暖行效劉誠意

戊辰建子月陽愆雨澤絕羲和縱轡翻日車玄冥
之權祝融竊百蟲蟄伏猶蠢動羣鳥非時鼓其舌
春臺舉國何熙熙踞爐熾炭真大癡紫貂狐白著
不得惱殺揚州輕薄兒

戊辰建子月桃李齊著花遊蜂浪蝶且一喜蚊蠅
扇翅聲呀呀隕霜不殺史所怪冬行春令吁可嗟
東鄰阿翁老更事呼兒墜戶大早計旦晚卽恐霰
雪零自古冬暄那可恃

悼亡詩十首

選三
序

妻姓宋氏諱貞歸予未四載而歿性婉淑善承

順二人志里閑間頗著賢聲先是予讀海陵吳
賓賢哭妻十詩言極悽惋爲妻誦之妻曰他日
亦願如此足矣噫孰謂今果然耶技淚亦得詩
十首如陋軒之數傷哉

芳蘭萎空谷彩雲化朝烟嗷嗷孤鴈鳴悽惻和哀
絃嗚呼宋氏婦秉性淑且純乙丑始來歸蹉跎失
芳年窮困易歡娛兩心交相憐爲儒昧生計坐缺
饗與飡拔劍思作客雨雪風滿天母曰嗟子季茲
事勿復言黃金雖千籬不如兒在前兒况新娶婦
詎不相周旋新婦跽致詞母見抑何偏負米實子

職由也矧大賢趣起戒行李孤帆在門前送行出
門外河水聲濺濺掩面歸空房淚落如流泉

一室何啾啾人語雜鬼哭邴得少踟躕黃泉路迫
促飛來白項烏啞啞上我屋心知不吉祥其時六

月六

婦以是日死

病婦晨起坐清水自膏沐再拜辭舅姑

雙足不得縮灑泣眼無淚酸苦只在腹迴頭語小
姑語咽氣復蹙可憐我生兒艱苦賴鞠育勿以生
死異飢飽時在目開我嫁時箱布衣未堪鬻指日
秋風來改作我兒服

徽音久如何日月倏已積枯坐慘不歡出門昧所

歷空房起晝陰冷氣出枕蓆牕多蛛結網案盡鼠
行跡亦有筐中麻燈火手自績亦有所對鏡花鈿
恣狼籍徘徊思言笑彷彿面如覲回頭遽欲語撫
心一標擗前夜夢見之色慘體更瘠恍惚絮語中
問兒何所食暫時冤鬼聚覺後泉壤隔忘情媿太
上莊在詎忍擊

涼夕

草際一蟲響夜高聲滿堂微風吹四壁朗月鑒孤
房笛起引遐思坐深增永傷迢迢牛女宿猶得兩
相望

文姬歸漢圖

中郎遭卓脅文姬仗操取此苟切異哉此父子兩落漢
賊手悲憤定何益請死亦孔醜捲圖不欲觀豈必
定誰某

效荆公烘蝨序

王荆公有和王樂道烘蝨詩司馬溫公亦和之
或者用以爲譏要之意各有托未可非也冬日
卽事戲效一首中段聊爾示幻所謂言之無罪
聞之足戒者非耶

屋山吹裂終風號曉牕瑟縮裏緼袍忽驚芒刺在

腰背爬沙那得仙爪搔嵇康性懶固多蝨老鰥衣
垢彌穴巢中單亟解付兩婢十指大索同搜牢屍
積便思觀宜築血流豈必杵可漂策勲牙爪已足
賀盡殲未若洪爐燎平須臾赴焰類蛾滅頃刻裂
體同龜焦偪膊直似武安震拉雜不異臯蘭鑿旁
及蚤氏下逮蟣一網而盡誰能逃小婢失聲忽大
噓獵得巨擘魁其曹婪酣肚腹脹麥顆亦有股腳
連肱尻諦視掌上聊玩弄厲聲呵責如雄虡曰汝
賦形極委瑣曰汝秉性專貪饕噬膚飲血恣口腹
微軀豈足充女庖蔓延孫子營窟宅爲肘腋患非

一朝投畀炎火且快意么膺焉用污歐刀熏心焚

身爾曷悔昂首彷彿聲嘈嘈阿房宮賦舊能讀於

傳則有非爲妖

見唐陸勳志怪錄

姑妄聽之譯以意其辭大

概多訾警似云族類實天產遙遙華胄名曾標藏
老僧衲具佛性遊宰相鬢經宸褒置諸壁間每見
愛捫來坐上偏稱高鮮衣美服我不顧敝褐破絮
君則招且聞人身厥蟲窟爲虻爲蚘爲蛔螻是皆
害在爾心腹若我所饜纔皮毛不見州衙擂大鼓
堂皇日坐煩榜敲擇人而食欲無厭吮脂吸髓竭
其膏取彼所得以例我詎異太山於秋毫而乃獨

於我乎懲茹柔吐剛非人豪何況相與有瓜葛屬
毛離裏如黏膠同根相煎何太急忍便赤族爭燔
燒須臾聲寂去不顧掉頭一霎如風飄聽其辭直
義亦正誅之不武寧相拋於物罕容實吾褊不虞
反脣來譏嘲處禪且效阮籍戲放生亦受坡老教
翻思火攻真下策披衣一笑倒濁醪

清明郊行

淮南寒食柳絲絲一片傷心落照時何處紙錢燒
不盡東風蹴上野棠枝

溪邊四截句

選三

天與閒身鎮日狂每來行飯送斜陽長堤葉暗侵
衣綠小圃花明潑眼黃

瞻袞堂下春水深跳波唼啣喧溪禽鳧雛鴨子莫
相避微子無人知我心
幾家村舍落照裏籬外野桃紅欲然老僧歸後寺
門掩暮鴉一聲衝暝煙

洗竹

卽刪竹也
見山谷集

藝麻麻欲密種竹竹欲疎新篠日以繁舊幹猶翳
如晨起礪我斧檢校手自除一洗耳目廓再洗胸
懷攄譬彼首飛蓬而得櫛與梳美材固足惜滋蔓

良難圖不聞古之人芝蘭當門鋤

短歌送賈九儀入都

春城軋軋曉曙鴉東家西家飛柳花柳花飛飛落
何處直隨遊子行天涯君經多難別鄉縣三載吳
閩不得見乍歸旋束金臺裝出門西笑長安長爭
名於朝利於市况乃鬱鬱懷利器雲霄之上多故
人富貴應須早身致如余蠹死螢亦乾凌風羨爾
生羽翰獻書莫效長沙哭聖代蒼生已治安

讀臨川集跋其後

裕陵天子神聖姿任賢求治同渴飢臨川崛起受

宸眷遇合天也非人爲草成十事頓首上朝野拭
目觀設施新法驟更民弗便羣攻交詆爭謦訾當
其擇術鮮不謂致君堯舜身臯夔志大氣傲識彌
闇誤比宵小恣奸欺范蘇諸賢亦矯激章呂數子
尤猖披凡百易成難慮始况復禍患先嘗之如公
正坐讀古誤軻言潤澤宜深思公才實出輩流上
苦心精詣誰能窺而以法弊致積毀謗傷反受羣
兒嗤脫令備職祇文苑大業詎不天壤垂我讀公
集爲下拜反復太息頻嗟咨

宿湖上聞漁歌其聲娓娓可聽而詞特鄙俚

為櫟括其意作六絕亦古竹枝之遺也

選四

經年拋網立船頭
娶婦生兒在一舟
眼見水荒三十載
我儂衣食幾曾愁

小魚換米來城市
大魚爭上販鮮船
清晨擔入揚州市
市中酒官人麤使錢

甓社湖邊荇葉長
露筋祠外藕花香
數平錢旋買

新真乙

郵酒之至賤者

曬網家家醉夕陽

湖上官船撸鼓過
看儂蕩槳聽儂歌
爭道渠儂生計好
菰蒲深處少風波

詠雪用歐公聚星堂體

霧幕白晝晦雲屯
衆陰鞏玄冥赫煽權
滕六歛愆憑聲挾廣莫
號勢倒漢江洶排拶
填空委合沓匝地涌
聯翩乍沾袂拉雜旋
沒踵沙沙蟻盤磨翳
翳蠶出蛹橫鋪苔堦
勻側積竹柵擁包荒
混垢穢平險失坡隴
綺錯蔬町迷篆裂冰
壑壅亦有粗比鴉亦
有細若氎髮髻女擲
砂掀簸農降種撇捩
姬墮樓招邀客登壘
揮霍疑逞財迴旋類
矜寵光眩睛絢暈凍
合肩鵠竦簾矸橫排
闥屋漏暗襲棋墜柯
飛羽駭陟橋逝蹇恐
揣封松輪困散綴棘
闕冗枯楊紛毳毳瘦
梅翕擁腫體方迺植
珪返圓遽列珙

午停示小怯暮合賈餘勇厨空竈婦怒鄰謹酒人
詢母僵擁絮唬兒頑據地踊爬掃盈筐承搏埴合
掌捧牢丸圓欲啖粒粒潔思奉獅蹲儼獰猙峰轟
兀峭聳爾嬉同吠龙吾哀比吟蜚銀鎔古稱幻車
載誰作俑所喜陽潛迴詎令陰久重抹背見現消
轉眴跳波溶溝澮決奔溜簷雷滴懸漣入地蝗不
灾破土麥方茸於皇受厥明康年贊垂拱

除夕雜感疊前韻柬樊桐仍索和章

初陽兆微暹積陰解深鞏年光蛇赴壑去不待憇
憑躔次紀告終榆臘颺餘洶送窮鬼抑揄索逋客

填涌門庭叢詬誅後蹈躡前踵千孔等攢蜂百緒

肖抽蛹無臺容趾避

周報有
避債臺

有絮荷肩擁婦嗔坼釵

鈿僕歆鬻田隴

二語皆日紀
是日實事

譬則百川潰而豈一丸壅

追歡緬疇曩餽歲劇紛翫樽窳宜春釀核釘洞庭

種椒盤坐列炬蠻榼行登壘

鄉人每於除日攜酒
食上冢謂之辭年

鼓鉦鄉

人儼炫服袞師寵磷編雙丞耀睽賜老尪竦紅箋

粘柱楣金花插簷拱方孩值節忻將衰撫時恐轉

憾節序促彌增惡趣冗繫予迺樗櫟不材木擁腫

凌寒厲孤響疊和驟雙珙

歐詩絮絮
得雙珙

殷侯才尤妙突

過孟賁勇橫空盤硬句萬夫不敢詢樂伯摩旌奔

魏犇距躍踊敏踰八又成珍同什襲捧詞場久疎
闊大雅罕推奉心折獨在君排晷句道聳直可諧
韻韶豈止答潛菴粵稽古倡和元白肇作俑韓蘇
鬪險怪詩律嚴逾重君才前不讓學海洪波溶膏
腴發炙轂甘酥落垂漣更冀出清新爲我薙荒茸
傳柑倘多暇報瓊竚延拱

題樊桐近詩後卽效其體二首 選一

侵晨宿酒渾如失入手新詩讀正纔好是陳言同

賊去 后山云陳言如賊莫經心 故應佳句有神來 殷璠論詩有神來之語 重湖駭

浪吟情苦荒縣饑墟生面開把玩周環堪永日新

年樂事正佳哉

同學諸子招入文社不赴長歌述懷并謝諸

子

春蠶作繭角鬪蝸蠹蟲食紙聲沙沙天公憐我落

苦海欲使擺脫超津涯粵予總角愛蒐獵百家經

史窮羅爬屠龍技就世罕用刻楮無益吁可嗟日

王崇儒好詞賦班楊東馬裝連車學臣連翩下禁

籟八絃廣設張羅置吉水 李宛平 高 東海 許 暨避

席授簡開官衙淮海維揚曰才藪森如束筍紛如

麻而我當仁志不讓掉臂徑入抽鯨牙干言賦就

不加點從容飲噉斟官茶詰朝名字上頭挂壓倒
元白誰敢譁使者召謁面獎我曰女今代文章家
小子頓首謝不敏朱提鑿賜禮有加爾時意氣極
騰上要窺蓬島乘星槎三科鍛羽羞羗穉煩寃內
火燔龍華肝神名靈臺炎炎歟空湧千鐘萬鼓相撞
搗間或細響類合樂瑟笙竽笛箏琵琶耳官驚匿
走失職聽答輒爾多遺差親朋走訊競咤惜亦有
調笑聲呀呀諸君何爲不我棄招邀見嗜如瘡痂
有兄聊可附騏驎如余只合儕麀麀每思投牒老
牖下巾箱棄置猶浮苴祇緣升斗竊廩食不爾有

覲胡爲耶二月楊柳青麤筆村桃遠近蒸紅霞曹
家介亭子頗不惡垂絲木筆攢春葩倘能置酒別
名我定泚渴墨蟠飢鴉維予唱女和亦可詎必攢
睂俯首乞靈故紙羣嘔啞

水後春食不繼家人采野菜雜之粟米中作
供余亦欣然一飽作詩示兒簡三首

夷齊恥周粟陟山采其薇我非敢效之飢來無所

依蕪菁生野地種自諸葛遺

一名諸葛菜見
劉禹錫嘉話錄

漫漫開紫

花碧葉紛葳蕤幸不隸園官採擷任所施晨起持
刀往亭午盈筐歸芼湘佐匕箸式食聊庶幾固窮

吾道在義勝戰自肥寄聲鼎食子膏梁安足希

右蕪菁

馬蘭是小草羅生遍石罅形與薜蘿雜香即揭車
亞厥味亦微辛薑鹽最宜下爽脆響牙頰甘馨謝
燔炙作羹或未可說餅允堪藉含笑問郎君何事

乃遭罵

盧仝馬蘭請客詩蘭蘭
是小草不怕郎君罵

右馬蘭

在昔天隨生籬落富杞菊杞也維上藥品列桐君
錄靈根名瑞杖佳實肖丹菽服之可輕身玄髮兼
明目二者匪思存祇用果吾腹新萸繁仲春

本草枸
杞春采

苗一雨遍山綠小摘入筠籃泥滓淨淘漉方法比

芋羹色香類茗粥五味令口爽羶腥即鳩毒何如
甘澹泊即此養生足作詩示兒曹未必不為福

右枸杞苗

讀劍南集感賦六首

選二

杜陵稷契思同調陸叟臯夔欲比倫誰使唵成詩
萬首後人也喚作詩人

放翁詩云六十年間萬首詩又題少
陵集云後人但作詩人看使我撫几

生谷
嗟

北伐何由見誓師眼明只望中興時可憐輸與東
屯叟少卻收京一首詩

放翁示子詩云王師北定
中原日家祭無忘告乃翁

讀史十首

選二

犁庭尅日勒燕然大閱期門發控弦塞上烽烟增
列障湟中方畧奏屯田區分北府材官餉斥費西
園邸第錢仰屋司農無過計由來卜式愛輸邊
驪黃雲錦事何如毛仲功名近代無誘牝當年誇
暴利絕塵何日貢余吾搜駒盡入飛龍廐買骨空
懸索駿圖爭羨五花三萬匹東南庚癸已頻呼

大愷鏡歌鼓吹曲十二章

並序

皇帝御宇之三十有六年仁風扇乎海表德澤肥
乎土域賢雋登進政治休明訟獄不繁稼穡滋

殖兆民樂業風俗完美維時恩流九垓威暢八
埏邇安遠至來王來享長胸貫股之壤雕題鑿
齒之國莫不搏心揖志樹領稽顙符拔辟邪駟
駮俊猊梯航通道絡繹獻貢蓋幅員之廣臣服
之衆溯自開闢越至近晚負乎崇哉莫之與兩
迺有西陲小醜恃其烏合不諛於我先是

皇上廓如天之度寬假羈縻永作外臣歷有歲年
乃敢包藏禍心撓我邊邑宸衷震怒議張
天討歷問於朝而盈廷之言咸以爲沙漠之地
不足以勞乘輿么膺之孽不足以膏斧鉞唱

口和附並爲一談

皇帝則謂敵不可縱蔓將難圖毅然獨斷不憚勞
勤躬歷險遠整率六師分道進勦蚩尤並轂招
搖前驅嘽嘽焯焯搏搏總總星陳天行雷動電
爍軍聲沸騰乎瀚海礮火撼搖乎天山旌旒蔽
空戈鋌耀日賊黨望風狐奔鼠竄一戰而挫其
鋒再至而搗其穴三驅而殲其魁妻子纍囚面
縛就撫遂乃禽獮逋匿蕩滌垢氛雲物開明神
靈歡喜是役也雖唐帝之戰丹水軒皇之克阪
泉何以侈茲蓋由我

皇上下大智大勇神武天縱往者命將遣師遙授方
畧不動聲色芟除三孽矧茲親蒞行間運籌
帷幄審敵情之向背察地勢之平阻策餉則軍
無乏食設伏則敵無遁形出奇用間開誠布公
動靜協乎天淵照臨並乎日月大勲是集俾無
後艱安妥生靈禔福中外夫惟幾也爲能周天
下之慮惟斷也爲能成天下之功

皇上卽謙已不伐讓大美而不居其可得乎在昔
周宣淮徐是平吉甫作誦逮唐憲宗削平淮蔡
韓碑柳雅炳麟焜燿之二主者考其地近在侯

旬之中計其時或至數年之久然猶震而矜之
鋪張揚厲使後世讀者望猶神人若

皇上神謀勝算師無淹久蕩五千里之雄邊除數
十年之逋寇貽億萬世之治安豐功偉績固當
邁羲軒而躋唐虞區區二主之事豈堪彷彿由
此觀之則上鴻號以章至尊作雅歌以揚大
烈此古今不朽之鉅業臣子愛君之至情曷可
少也是以內而左右密勿之輔石渠天祿之彥
外而封疆牧伯之臣罔不極慮遠思導揚嘉美
鏗鏘映燭盈緇溢縹竊思臣一介草莽於時事

罕所通達此卽鏤心鉢腎禿穎焦墨豈能仰測
高深揚扈萬一繼復自念臣生於

皇帝卽阼之五年游泳光化躋嘏汪濊者三十有
二載况臣稍具識知業職鉛槧戴高履厚宜如
何報而又生享太平躬逢盛事則安得如塊然
木石自棄於堯舜之世臣聞詩以言志歌以永
言古者太史採之輜軒雖婦人女子室家言情
之作亦得獻之王人用於朝廟未嘗以出自微
賤棄而不錄又聞古之帝王功成樂作考黃帝
之破蚩尤軍中鼓吹有震雷驚靈鼉吼諸曲湯

之大濩武之大武卽作於伐夏戡殷之後下至
唐太宗有入陣之歌破敵之樂皆所以發揚蹈
厲紀功德而鳴得意夫以

皇上之盛德大業赫聲濯靈如此而雅歌不作臣
甚惜之謹按周禮大司樂曰王師大獻則奏愷
樂大獻獻捷於祖也愷樂獻功之樂也大司馬
曰師有功愷樂獻於社愷樂兵樂也獻於社獻
功於社也司馬法曰得意則愷樂愷歌示喜也
城濮之戰春秋傳曰振旅愷以入於晉愷凱也
東漢明帝分樂爲四品其四曰短簫饒歌之樂

軍中用之崔豹古今注曰短簫饒歌軍樂也饒
如鈴而無舌有柄執而鳴之昔人用以節鼓其
曲凡二十二篇魏繆襲晉傅玄各如其篇數而
易其名唐元和中柳宗元作唐饒歌鼓吹曲十
二篇進呈而未見施用臣不揣鄙陋詳考 欽
頒北征方畧 恩詔赦書以及邸鈔 睿畧永
清疏稿卽事命題古體新聲不蹈故常竊倣漢
代饒歌鼓吹曲之遺意自聖武至獻賀觴撰成
十有二章凡一千四百餘言雖詞語謏陋音律
乖舛遠慚吉甫近媿韓柳知不足貢聲 宗廟

備當代之樂府然鼓吹休隆颺頌謨烈實出一
念忠愛之誠不能自已用敢忘其微賤錄獻牧
伯進呈 御覽倘可採擇伏乞宣付史館附於
方畧之末列之臣工之次使爝火之明依餘光
於日月坳堂之波納細流於滄海且令天下後
世知

皇上聖德神功感人者深及人者遠渺爾鯁生亦
搖筆蘸瀋希聲附響昭垂於永久臣雖長淪藪
澤不獲進身 闕廷退而與閭巷之匹夫匹婦
擊壤鼓腹亦所愉快臣不勝大願謹序

聖武

伏讀方畧云傳集三品以上會議皆云小寇不足介意朕
深為憤怒決計親征使天下從此永遠寧謐作聖武第一

維皇建極天錫厥武跨羲邁軒踵堯肩禹翦刈僭
慝和會區宇海不揚波山無伏莽日所出入人人
土土惟是西陲在昔卽叙潢池跳梁震驚邊圉僉
謂么膺不足膏斧 帝曰咈哉曷予敢侮 親御
六飛嘽嘽其旅黃鉞白旄瑠戈彤羽三辰萬靈罔
不協助 皇帝聖智不可測覩靜合符契動中規
矩若卜著蔡若燭肺腑奮之以斷決之於豫羣策
羣力十不得五用集大勲以對天下貽謀燕翼篤
祜錫嘏 聖謨洋洋載在冊府石室金匱於鑠萬

古

右聖武四十二句

句四字

從軍樂

伏讀方畧云一路大兵並無勞苦兵強馬壯精勇齊備作從軍樂第二

牽馬出里門。扈蹕邊城去。西陲有遺孽。狡脫甚投兔。誓滅此朝食。家室非所顧。附書與六親。不必念苦辛。天子是主帥。拊循如家人。天子是主帥。士氣為之揚。天子是主帥。甲冑生輝光。蚤夜五十里。在道無兼程。軍中米粟多。到處泉流清。昔怨從軍苦。今歌從軍樂。功成受上賞。圖形在麟閣。

右從軍樂二十二句

句五字

役者謳

伏讀方畧云兩路米糧未有窘乏復將中路之米接濟西路作役者謳第三

輦粟陟硯山。石齒齧。豈不憚行。念我聖主。念我聖主在軍中。親韎跣。盱乃食。蚤夜不得休息。小人戢戢。敢告勞苦。驅駝千匹。牛萬頭。峙乃糗糧。負乃餼餘。粟纍纍。棄道周野。鳥爭啄。聲啾啾。

右役者謳十九句

其七句句三字其十一句句四字其一句句六字

歸化城

據邸鈔云遠方向風日眾著於歸化城安插作歸化城第四

歸化城。徠遠人。日入之部。就我日出。主聞風者。施施來來。施施。帝念之。作室家。相厥居。俾爾父母。兄弟。妻子。無寒饑。出作入息。以遨嬉。駐者歌。行

者思歸化城樂不可支。

右歸化城十八句

其十三句句三字其三句句四字其一句句五字其一句句八字

神泉出

伏讀方畧云各處未報得水正憂慮間適親軍侍衛飛馳過一山岡見一泉下流六七里足供大軍

馬匹之用作神泉出第五

皇帝北征度沙磧有萬其祇護厥蹕大軍道渴未及食后皇愛寶弗敢匿有列者泉感沸跳擲躅突素波溢軍十萬衆可用汲地靈效禎重申錫會涌神膏 帝之側其淡如醴甘如蜜 皇帝酌斯壽萬億

右神泉出二十二句

其十句句四字其十二句句三字

永清碑

據邸鈔云上親征沙漠至西域山掘得古碑有永清沙漠語作永清碑第六

禽敵山峙西域上有古碑高萃嶺不知其歲年但為草木蒙翳風雨剝蝕獨有永清字不泐 聖人來古碑出兆熙朝曆萬億先後聖其揆一從臣雖多才燕然不更勒

右永清碑十七句

其十句句三字其三句句四字其三句句五字其一句句六字

征馬肥

伏讀方畧云克魯倫地方自正月亢旱不雨其地原無寸草連日天作陰雲立營畢即降雨澤草木

萌生馬匹臙壯作征馬肥第七

自正月不雨至五月邊地不毛雨澤竭一夜勾萌蹶厥生 聖人所過皆陽春雲氤氳覆四野神哉

需自天下草青青牧我馬我馬肥騰絕足來向東
追極北月支臣闕氏服我馬肥天之育辛苦漢武
帝上林漫漫種苜蓿

右征馬肥二十五句

其十九句句三字其四句
句四字其二句句五字

破陣樂

伏讀 恩詔云賊踞克魯倫河倉皇宵遁朕親追
至土喇河西路大兵遮截其後敗之於昭木多賊

勢大挫今年春西巡邊境噶爾且窮
迫已極仰藥自盡作破陣樂第八

礮車轟天白日燒闕如虓虎軍聲塵天威所到心
膽墮霜刃未交敵壘破塵漫漫大風起鼓不絕馬
逸不能止窮寇解甲降巨憇抱鞍死 皇帝曰嘻
武不可究罪人斯得矧敢多又旦日將軍來幕府

上功簿峨嵋甲仗高於山孳畜谷量不知數 天
子受賀軍門開山呼萬歲聲如雷

右破陣樂二十六句

其九句句三字其十句句四字
其五句句五字其二句句七字

釋纍俘

伏讀 睿畧永清疏云哈密國人生擒噶爾且之
子色不騰巴爾朱爾俘送 行在又丹濟喇攜噶

爾且遺骸及其女子並人口三百戶來歸又諦巴瑚腦兒台
吉濟農等亦奏請朝貢及阿喇布灘丹津汪布等俱遣人輸誠

效順作釋
纍俘第九

臨高原漠北墟其無人但見風馳霆擊沙石的礫
爭飛奔殲渠魁喪厥元自餘跂行喙息百一存寡
妻弱子俘軍門 皇帝德大蓋載遠邇曰予不孥
戮爾多賜繒帛美酒甘食與之更始傳告種人赦

女脅從貸女死盍歸來乎 聖天子

右釋纍俘二十一一句

其八句句三字其八句句四字其四句句六字其一句句八字

回鑾曲

據邸鈔云上於五月十三日凱還作回鑾曲第十

昔往歲云暮今來日正長送行未半載夫歸見妻
兒喚爺與孃歸告爺孃妻子此行歡樂不可當隸
籍羽林尉身近日月光鑾輿肆天討萬里震雷霆
元兇束手斃餘孽走且僵大軍十萬騎人馬無寸
傷五月奏凱還歌舞向京城都人望 翠華夾道
羅壺漿 皇帝顧之樂命下趣銷兵放牛於桃林
歸馬華山陽卒伍事耕鑿從茲罷遠征罷遠征無

戰爭沙漠清天下平

右回鑾曲二十九句

其四句句三字其二十二句句五字其一句句四字其一句句

六字其一句句七字

大愷

據邸鈔云上至京論功進爵升內大臣費揚古為一等公其餘加級班賞有差作大愷第十一

奏愷樂歌彤弓。縱鼉鼓。鏗鯨鐘。酒再行。樂三終。羣
臣拜手上。帝功。帝不自功。謂女庸爾。諸臣來。
大者公。小者侯。釐爾圭瓚。拒鬯一卣。維茲山川田
土弗敢愛。分土三列。爵五及苗。裔永終。譽。

右大愷二十一一句

其十五句句三字其五句句四字其一句句六字

獻賀觴

伏讀 恩詔云武功告成之會正太和殿鼎建功竣臨御伊始覃敷慶澤中外有差作獻賀觴第十二

將進酒開明堂通九域朝八荒武功偃文德昌
皇帝御太和殿 太子諸王以下內臣外臣列兩
行謁者以次引見踴躍歡忭稽首頓首上前獻賀
觴汎仙醴斟天漿和氣致祥豐年穰穰卿雲糾縵
景星煒煌賓連萑脯生齋房麟遊於野鳳鳥翔
皇帝坐殿上乃大歡喜曰予一人曷克臻此亟令
掌故肇稱殷禮類 上帝禋 列祖簡刑獄蠲租
賦廣封卹宥罪罟禮樂興孝廉舉賜大小臣爵一
級與天下大酺三日小臣醉飽沐浴膏澤是用作
歌紀功德願 皇帝陛下百千萬億歲歡樂永無

極

右獻賀觴四十二句

其十六句句三字其十三句句四字其三句句五字其三句句

六字其六句句七
字其一句句十字

廣陵旅次喜晤顧十一俠君長歌奉贈卽送
之歸吳門

榜前失意我不憾牀頭金盡我不哀眼中一見顧
十一世間萬事如飛埃寺門日落飛蝙蝠何誰車
騎紛喧厖須臾四壁走光怪詩字隱隱生風雷秀
埜佳句久在口側身把臂嗟無媒祇園寓居得鄰
並打門徑造寧嫌猜底用三升劇談論直思十日

相追陪而君呼我曰奇士我定識君非凡材考功
家學有傳授雄文拔起彌崔嵬卽看駿足騁皇路
一蹶暫爾隨駑駘天遣斯文作主宰網羅載籍兼
而該天曆至正盡收拾曷不料理歐蘇梅來江都
游值秋老隋堤霜柳紛瑤琨此間傖荒乏風雅但
可爛熳傾尊壘便當捆束下揚子玉山已熟鷺黃
醅不爾宿畱胡爲哉我亦掉頭歸去來商丘中丞
雅愛士振衣會上姑蘇臺鴨觜艇子順流放草堂
遲我南枝開

上宋中丞漫堂先生五言古詩一百六十韻

嵩山天下中奠位尊四嶽駿極勢截業去天止一
握二室六十峯連蜷亘綿邈元氣涵渾淪厚質欲
旁龜地靈神異鍾曠代偉人作翰周生甫申降祥
蓋不數恭惟文康公熙朝調鼎鑊廟堂籌大計海
宇悉安厝皇哉輔相業炳麟照殿閣惟公其胄子
繼起家聲赫叶丰標獨峻整才氣彌震爆束髮侍
先皇執事日有恪緘口溫室樹小心期門鑰羽獵
陪長楊巡遊周五柞飛鞚每騰上射生必連著時
蒙天一笑手自賜酒酪公以大臣子入備宿衛時賜酒食珍菓鼎湖俄上升
歸來枕圖籍叶帖括應制科文苑肆蹁踔傾蓋多

肸僑同舟盡李郭雪園六子社公輒相倚捫公與侯朝宗賈

靜子諸先生倡六子社允矣溟徒鯤何哉枳棲鶩一麾判黃州敢

效淮陽薄前身真髯蘇冥想契寥廓墨池跡未湮

雪堂構猶昨公嘗作蘇子瞻像貌已其側及筮仕竟得黃州汪編修鈍翁先生說鈴載此事墨池雪堂皆公所修復

往聞道路語軼事記疇昔叶江城饒於菟白晝負

嵎攫使君彎霹靂發矢脫兩膊一朝而獲五除患

同去鰐此直小技耳我公付一噓黃多虎患公一日殪其五患遂息敷歷

陟秋曹夙夜奉三尺叶故事兩司官紙尾但畫諾

公曰是不可據案獨諤諤慮囚多平反不憚一再

駁律法為更定冤抑免呼晷如彼啁啾中百鳥得

一鶚直聲振朝班璽書筦虔權處脂膏不潤遇涅

滓偏嚼載石壓歸袞觀察俄外擢叶通永號馮翊

狐鼠恣陵轢公御之以簡推誠去文貌揚清舉疆

項公薦彭黃門無山先生鋤姦除毒蠹熙熙畿甸民三世沐膏澤

叶借用公從曾祖莊敏公起家永平司李歷總督倉場侍郎文康公以遵化道開府畿東至是公由刑部郎中陞通永道皆兩公舊治也掌臬

轄山左政聲溢濟樂旋命藩東南三遷宸眷

渥西江被兵後民氣大蕭索帝曰疇予撫欽哉

往女犖使持御史節開府建閩幕時值風鶴驚迅

烈楚氛惡兼程亟就道指麾運帷幄二豎倏逞兇

乘間伺剽掠裂紙潛書符揭竿陽會醮遙為西寇

援洶洶氣燠焞勢將連荆襄卽恐動珂符公偵知
此變密計夜生縛元兇夕以逮首領朝以斲機間
不容髮若震霆飛電餘黨鳥獸散汗流駭且愕朝
不驚七鬯野自安里宅叶微公事幾殆談笑靖鋒

鏐

戊辰四月值湖廣叛卒之變江右震鄰公甫抵任姦徒李美玉袁大相謀不軌乘夜計禽旦卽懸首藁街餘黨賊散亂遂平見公誅叛御變二

疏及劉山蔚紀畧

卽此策殊勲况乃厲精白

叶

飲冰凡四載

治行日起卓巡撫不要錢

天語何焯焯

辛未閏七月一日

上在暢春苑問大臣云江西巡撫宋犖不要錢你們可知道回奏云知見邸鈔

所以轉南服重任昇盤

錯相傳移節時傾城走矍矍老幼競攀號公淚亦
爲落一自公來吳閭井樂耕鑿貪吏禁苞苴蠹胥

嚴合龠精彩變壁壘號令謹鈴柝獄訟化虞芮奸
宄絕跼躄淫祠毀五通市肆罷六簿百務靡不理
造士功尤倬衡品別真僞較藝判清濁丙子歌鹿
鳴解額正新擴公時董厥事軼才悉籠絡粲粲珊
瑚網中不遺砂礫叶淮揚古澤國衆水之所壑厥
田多沮洳積歲鮮稔穡有時龜兆坼一望盡堯堊
何能辨眵晦而不任錢鑄司空告績成陞科議征
涸鄉氓半流亡里長捩頭捉傷哉凋瘵民眼見死
鞭扑公乃抗疏爭逋賦蠲七邑叶特免自聖恩
天聽因誰格借用高寶七邑積水偶涸出者時議開征公力爭得免支祁忽失守陽侯

又逞虐淮黃交汜溢波浪互澆澣周遭沒城版直
 下蕩櫨樽生民胥及溺魚鼈縱啗嚼一甚乃至再
 兩載失耕獲掘地啖草根探巢哺鵲鷓時艱公蒿
 目瘡痍日求莫復請減額課振廩發米穀叶寧甘
 絀吏議要欲軫民瘼終焉得 俞旨正供悉除卻
 活人百萬餘感頌敞齟齬公豈望報耶至德假冥
 漠丙子丁丑淮揚疊罹水災公力請蠲賑部議革職不為之阻朝端望逾崇元老為揚摧
 清廉天下最 至尊俞曰諾行將聽麻宣不必待
 龜灼丁丑十二月 上問滿漢大學士天下巡撫賢否大學士伊公奏云江南巡撫宋犖清廉為天下第一 上云宋犖清廉朕久已知
道見公才本富有佐之以博學貫穿窮冊豕今古
邸鈔

任揮擢淳意發高文森秀鬱磅薄新詩追韓蘇近
 體鄙盧駱靡音黜淫哇正聲配韶濩興來鬪險句
 肝腎苦瑯琢漁洋共綿津價重連城珏公詩格宗韓蘇為海內宗匠有
綿津集行世昆陵邵子湘合王侍郎阮亭集選刻名二家詩鈔蒐羅既精核紀載又該博有
廊偶筆間亦復為之小詞唱捉搦有楓香詞年來德彌邵
諸書綺語盡刊削躬行期實踐章句謝糟粕重申鹿洞
 規大闡驚湖約粹然儒者宗講義共披剝西江崇
 俎豆東林清祠禴吾師乎誰歟繫關閩濂洛公在西江建理
學忠節二祠修濂溪鵞湖書院刊胡文敬先生續白鹿洞規親為諸生講說蒞吳修東林書院釐正祀典素心厭煩囂
 雅志敦儉樸所居闢小軒厥制只確斲深也故寧

靜淨矣斯澹泊

公署內小軒顏曰深淨

長物羅書史旁堦種蓮芍

清漣波瀾瀾婀娜柳嫋嫋泳游百頭魚踰躩一個

鶴微微風動琴了了月上箔杯清蟻乍浮爐紅茗

初淪山僧許來往

公與盤山拙菴北蘭澹雪廬山心壁諸道人為方外友

野客間酬

醉揮塵縱談笑命觴繼諧謔洗心展圖畫入夜猶

捫摸

公精賞鑒有論畫詩嘗云黑夜摩挲而嗅之可別真贋

風流王文度放曠謝康

樂偶值風日佳發興在巖峒爐峰瀑噴雪元墓梅

破萼獨賞屏車騎孤尋度畧豹勝處即小停會心

付杯杓荒墳剪荆榛

唐六如解元墓在桃花塢公修復之建亭其旁曰才子亭

古亭重

丹雘

又修復蘇子美滄浪亭自為文刻石用歐陽公韻作詩紀事屬和凡數卷

試問今大吏高風

孰能若竊嘗覽載籍人品相量較或文如燕許或

武如褒鄂或清如楊盧或智如管樂政事曰韓富

勲名曰衛霍是皆得一端擅長彼此各惟公萃其

成萬象包一橐道德兼事功文章雜馬稍

文章馬稍任縱橫尤

檢討悔菴先生贈公句

智勇一世推心胸萬古拓豪傑而聖賢當

之兩不忤嗟恒生下邑戢影傍菰蕩散才類樗櫟

鈍質慚干鏌細響蚓發唱微光螢吐爝為儒百不

遂窮年事伊喔省門凡五踏棄比風中籜矧乃嗟

贖贖難免笑妮妮人情喜刺譏從古嘆謠詠何期

渤澥寬不肯遺一勺錄我在門牆食我以脾臆賜

子及書籍料理到醫藥疇昔匪無遇泛愛終隔膜
知己與感恩舍公將安託傾誠矢圖報酬知祇述
德叶惟欽斗山重尙愧筆墨弱媿媿豈云多曰此
其大畧蒼蠅附騏驎叶蕙蘿施松柏叶雲霄方喜近
樊籠未苦鋌但願畱衰衣莫遽懷笠箬永言事掃
除爲公把鉏鑿

虎丘次清遠道士韻

我居如桃源世不知有漢自憐麋鹿性見客颺颺
竄竭來吳會遊海湧得奇玩是丘名天下陟歷戒
汗漫循磴遠修廊汲綆頰高岍崖裂苔文斑石曠

雲影亂視晷漸可中選勝未閱半遺踪緬霸圖精
靈未應散銅棺成底用萬古一昏旦轉羨飛仙遊
譎詭騁辭翰撫景愜見聞卽事動嗟嘆飢驅亦良
圖茲遊信天贊

古風一首賦謝漫堂先生

元公好士古罕儔吐哺握髮日不休誰歟繼者今
商丘相門世德清望優朝之柱石天廟球持節來
領東諸侯接引巖穴勤攬搜騷人賤子趨紛投譬
則滄海納細流賤子者誰家秦郵束髮聖籍恣討
蒐呶唔繼晷焚膏油十年上書不見收瓊璣蹭蹬

心繁憂鬱鬱苦被青衫囚兩耳蟻動同鬪牛迫蹙
直似魚中鈎但願一識韓荆州擔簦負笈來長洲
千五百字窮雕鏤大呼持獻驚前騶牙門旗翻風
悠悠欲進不進心踟躕叶公乍讀之聲噢咻開門
促召延枚鄒弊衣入座貌不修問事不省瞪兩眸
左右掾史齊回頭頗見有如此客不公獨我愛不
我尤曰偶然耳行當瘳欲與之共商千秋左馬班
范韓柳歐將子能來從吾遊與奴白飯馬青芻叶
杜句旋飭中廚具殺羞金尊灑灑旨酒柔醉飽拜賜
重疊稠琅函秘笈緇以綢朱提白粲連尊白爾羊

來思負其餽旁觀驚羨莫測繇抑有天焉非人謀

時中丞有書籍
羊酒之賜故云

繫公之德誰與侔如地持載天覆幬藥

籠願備渤與溲日侍唵案供校讐有時公倡我則
酬未必不若伶人謳廟堂燮理需運籌公名旦晚
糊金甌更起祝公弘遠猶寧人敷政無競綵洪鈞
手轉萬邦揉太和元氣蒸蒸浮不使世不爲成周
吾道行矣夫何求千年史冊垂炳彪文康接踵光
前猷

漫堂先生打魚滄浪歸以饗客恒叨陪座末
卽席賦呈一首

初陽暎暎光入簾鶻姑格磔鳴高簷夜來雷雨一
尺足滄浪漲淥平橋添商丘夫子烟水癖打魚放
鴨心所欣朝衙放罷興躍躍亟呼小隊搴彤幘到
時便作濠濮想一篙卵色浮晴奩紫荇翠藻宛可
數游魚澱澱頭排籤老饕臨淵忽起羨吾師爰命
加之罾小網也須臾千頃浪花亂素鱗出水光磨鎌
跳波帶怒尙潑刺鼓腮似語相喁噉何以貫之曰
楊柳維魴及鯉鯪鱠鮓毛詩鯪鱠鮓鯉鮓即鯉也擔歸纍纍屬車
下兒童拍手父老覘叱付春庖佐午膳于以湘之
漑釜鶩吳兒斫膾最解事作羹不煩女手摻輕紅

肌擘鬣鬣動薑蔥細糝和椒鹽銅盤會食並見召
攝衣入座予何謙我家三十六湖濱舊耽水族情
無厭大嚼不顧侍史笑盡食那怕厨孃嫌撐腸一
飽且快意咄嗟仲子烏能廉每嗤國僑市小惠生
魚命畜無加殲仁民愛物有差等底事得所誇沾
沾何如乘興一舉網恩波上下均得霑時漁人皆有賞賜韻
事屏風又堪畫風流爲政公所兼嗟成急遞廣平
老屬和好待青門髯邵文子湘
西洋繡毬花二十韻應漫堂先生命
綺檻薰風做瓊葩異域傳移從古俚國購自蜚人

船海露蒸猶濕蠻烟拂倍鮮蕊攢紛壓疊辦簇細
雕鐫蹙繡鴛針密團窠蝶翅圓同心綵勝結五出
素絲纏絡豈流蘇墜拋寧鞠域穿憑誰調幻藥直
似染丹鉛淺紫應名玉微青合字蓮揉藍南浦水
散綺晚霞天花色如此素質從嗤陋朱顏或比妍閩中有大紅者
叢生根擺矮幹亞影連駢翠盎培栽穩雕闌位置
便評香雖闕爾比艷最嫣然郭璞疏遺載嵇含狀
失編搜奇公好事寓目我何緣更憶誇殊植相將
襲短箋尹邢欣接踵瑜亮許差肩春日同詠日本山茶先生有尹邢相妒之句
珍賞看宜數嘉招句重聯不愁風輓墜長對畫簾

前

勵志詩四首 選二

性癖耽書傳譬若蟲蝕木異本購不能就觀憾迫

趣比來百不憂動輒副所欲綿津富書庫插架三

萬軸昌黎句借我不作難鱗次卷帙續且漁且畋獵

析疑快老宿謂青門興至廢食眠坐深怨僮僕脫贈

亦復佳得隴敢望蜀樂此詎為疲倦勤用自勗

粵子稟羸質目短視不道近又患耳鳴一身若贅

疣獨抱方寸心耿耿萬古憂憂之夫如何尚慕孔

與周邈焉二千載斯道今維昭叶立言竊所願經

史窮雕搜健筆誅奸諛孤光闡潛幽師承矧在近
二老漫堂今韓歐古人擅一藝精專尙可求樂理
通師曠國語成左丘非敢曰能之坐食戒惰偷天
乎假餘齡勉旃紹前修

苦雨詩呈漫堂先生

戊寅月建辰亥冥驕不退黯黹陰沴凝鬱勃澤氣
會霖亂積氛旄霖狂肆霏霏豐隆勇轉磨列缺戲
揚旆少女九妖邪欠伸時一噫鼓鬣龍騰拏滴鬃
馬沛艾衝簷雷垂瀑喧屋瓦鳴瀨密密銀竹排桓
桓白練絙細或如繭絲圓亦若珠琲跳蹙勢激越

濺沫響勺磴紛射斜侵檻橫潦瀉瀉澮霰霰夕逮
朝霰霰朔至晦踉蹌太皞奔澁縮鬱儀避漂池溢
賴萃擢壤茂梧檜頽架老紅浥蔭牖稚翠蔓欄藥
帶微芬逕蕙掩孤馥抱房蝶翅黏鑽窠乙羽鍛鳩
婦號勃溪蟻子走狼狽埴謹厲喙啄沼沸長股吠
盈矚鮮懼悰觸聽總悲嘅放霽乍示迂成陣旋作
猶遂止斯已可益甚毋乃太駭勢鎮載叟餘飛間
逞態牆蔓繁葳蕤道弗雜蕪穢木茵蒸綴疣瓦松
森擁蒼苔緣砌重敷蝸涎壁增繪泥浣濺榻几黴
醜黝祛禴舉步阻凜淖撼寤怵澎湃贅耳虛鬪蟻

痒肌濕搔疥望雌霓睫穿眇帝青心痲臨餐輒興
歎際飲動停嘬燒草問筵尊檢曆卜著蔡眈眈眸
只瞪咄咄腕自搯鄉園疲夢想老屋缺苦蓋淋漓
怕書籍傾側任倉廩薪濕竈絮媪粒昂市喧僧倚
閭予季嗟傾室思婦喟此第家事耳吾更慮其大
三吳租賦重麥秋衆式賴田秧甫針卓野蕤未銍
又雷收誠懼損蛾化最憂敗所關在閭閻於患豈
纖芥又如淮與揚七邑劇凋瘵陸沈十之九橫流
一而再積潦漲未落新湍溢逾潰空邨戲游儵危
堤眠衆捨無可急耘耔寧不患顛沛大吏議救援

小巫請禳禴雜然羣獻疑率爾等諾諄或云析木
翻屈注連九派或者曰天泣啜其涕泗灑不則上
帝醉漏卮羣嘔噦洶洶近嘲談夢夢總茫昧誰闕
京房占莫置仲舒對聞之上古世其雨不破塊十
日以爲期津莖但濯漑應候斯名靈久靈遂凝害
寒暑錯代禪丁壬失妬配害柔宋則弔志閔魯所
載方今 陛下聖功德岌華岱和氣翔氤氳惠澤
恣汪濊三公勤燮理百職謹玩愒於何致愆尤而
勞示鑒戒作霖時固舛咎狂理更詩旣非戎雋區

四川戎州宜賓縣二山四時雷霖俗
謂小漏天大漏天又雋州亦有漏天

抑豈柯枝界

柯枝國自二三月
下陣頭雨至八月

半方晴

絜災比蝗喃較毒甚戈銳凡民罔不敵爾罪
胡可貸我欲排閭闔叩頭訴梗槩大聲霜簡糾血
面露章劾屏翳遠驅置畢宿暫楛械九州安耕鑿
萬象啓蒙闕昉昉禹甸平赫赫堯日曬指鑑露景
光挾幕破氛靄庶幾天漏補積憤始一快榆莢期
已過梅子時又屈微微颺尙飄昏昏勢未殺失眠
輟書課嗽藥兀官解妄言舌宜捫苦語力已憊效
潘振蛙唱晉潘尼有
苦雨賦踵陸厲蟬喝陸雲有
愁霖賦采風告仁人
茲篇可無廢

長夏漫堂先生出所藏古繪事法書見示因

呈長句明日將渡江之吳陵

火雲行天赤日酷白汗翻漿作三伏中丞衙散襪
襪無解帶科頭對修竹朱華翠蓋敷清池召客列
坐相娛嬉高齋空虛鮮長物那覓周鼎兼商彝洗
心祇覺圖畫適逸品神品分甲乙平頭奴子親捧
將玉軸錦囊包裹密老子意氣真堂堂兩旁參佐
如堵牆手披口說坐復起健如海鶴森開張馬遠
春晚景趙昌寫生花九老鬢耆劇生動洛靈環珮
交紛拏是日所
見數種而我獲見所未見但聞左右嘖嘖聲
咨嗟就中坡蹟尤所愛七百年餘露光怪婀娜剛

健倍有神

坡詩剛健含婀娜

璀璨陸離騰墨彩忽然眼底走

烟雲海嶽菴圖更好在捲圖命酒清風生師乎師乎移我情明朝一舸掠江去正向元暉畫裏行

吳門徐昭法先生畫芝

壘圻輪困態最工披圖謾謾起清風定知崖畔叢三秀不在祥符萬本中

四皓當年彊是非商山芝媿首山薇祇應乞與徐夫子閉戶丹青為療飢

謁露筋祠

野風獵獵捲靈旗為駐征帆拂蘚碑不比清溪蔣

侯妹渡頭爭唱小姑詞

滑笏平鋪十里光珠衣玉珮儼明粧貞魂欲酹無椒醕迎面風來荇菜香

送漫堂先生奉命會勘下河濬海口故道

頻年浚洞切宸憂簡命新承視海陬天怒漸

夸應有豸民勞已甚可無鳩漫言賈讓工三策好

為司空借一籌聞道歸墟多舊蹟

聞諸土人范公堤海口舊蹟甚多不止石礎天

妃草堰丁溪白駒數處今皆湮沒

輶軒試與重咨諏

秋懷詩序

瑟居興盡搖落驚心日月其除愾焉寤歎觸境

引緒情見乎辭

衙齋本清曠况乃秋深時風葉走虛廊霜荷倒枯
池昭昭天宇淨擾擾節物移縱心入寥廓冥懷付
希夷足音稀亦佳福性聊自怡

孤桐生井上葳蕤屋西偏團團碧葉大藹藹清陰
圓憔悴蔭夏日主人樂高眠歛忽奏金商隕黃質
獨先空階一雨後散落如飛烟物理固若此勿爲
慨唐捐

拒霜沼之濱掩冉媚巖篠微颺一披拂翩翩戲小
鳥開時及秋殘顏色幸自保終然憾遲暮未及桃

李早娟娟風露涼膏沐爲誰好

遙夜難爲晨披衣坐昧旦轉眴晷景馳疾比馬失
絆逝者遽如斯時哉詎堪玩何以永今朝但了食
與盥拊髀志士驚惜陰曩哲歎沈疴纏壯齡憂若
衣匪浣

霜風淨場圃晴日急穰稬萬寶告厥成役車此焉
暇我田久不治曷以望我稼親缺三釜養兒衣不
掩髀俛仰增永懷顧影動悲咤

宣房沈璧後黃流日奔渾勢挾清淮俱驚濤浩無
垠哀哉七邑子半作魚與鼃九重下明詔相視

疏海門就下理則然未若殺其源注江維禹績芻

時奉旨會勘海口而民間有不如

開西河之議

題宋山言學詩圖

詞場源流溯國風詩三百篇其正宗三唐兩宋互
嘲評去何異墨守而輸攻綿津山人補天手大冶
陶鑄金在鎔投之所向無不可百家萬態歸牢籠
次公同時最超絕千言下筆攀軻雄緯蕭一編在
人口妥帖排真盤空異才天授豈人力亦緣家
學傳乃公披圖忽爾得此境肅然而起爲正容箕

管萬個雙梧桐左右几杖圖史充老子婆娑坐短
榻壁立清峙千丈松仲也渥丹昌且丰奉書側身
禮則恭非關脫誤辨亥豕豈屑瑣細詮魚蟲我知
會意別有屬偶拈妙句心賞同不見畫師劇解事
傳神盡在阿堵中莞爾注視默相向意匠指授神
明通杜陵宗武解口誦昌黎阿昶尤凡庸君家三
世世有集丞相之後聲颯颯風流文采相映發今
代頡頏王山東弟子侯芭衰且醜日侍絳帳煩磨
礪格律偷取終鈍賊不學面牆胡由工辨香會且
索圖去乞靈不鑄賈島銅異時效顰更寫似茅簷

曝背追吾翁

題王石谷騎牛歸田圖

燕京雪片大易水悲風寒笑問牛背上先生奚不

冠

角

蕩蕩萬斛舟未若此間樂老無用世心漢書不挂

喜

畫師能畫神和風蕩趾趾江南芳草多丁櫟爾亦

宮

舊隱懷烏目長謠望海東茅茨山下路合與製牛

贈毘陵邵子湘先生

有序

往讀宜興陳檢討集中兩髯行知海內有子湘
先生心識其人丁丑冬予奉檄作大愷歌詞時
先生客商丘公許見鄙作大驚異之亟言之公
招致院署先生一見折輩行與交相得驩甚一
日酒間先生掀髯大言曰李百藥爾以五七言
古歌詩有聲淮海間盍以爲長者壽余聞命避
席慙赧瑟縮謝不敏已乃擁鼻嗚嗚作聲燭盡
一寸放筆得數百言燭光墨瀋翻翻閃爍紙上
脫稿亟呈正商丘公公曰是可以壽青門矣趣

小史舉解連醕先生先生大笑樂飲徑醉乃擊
節全予曼聲歌之

千古史筆推龍門班范繼起體制仍後來八家漸

紛紜或取其貌追其神逮明二川

震川 荆川

亦斌斌廊

廡唐肆各有臻青門髯公才絕羣九龍毓秀珠孕

淵十齡思壯賦采芹舞勺卽充觀國賓擺脫擲卻

頭上巾鑽經研史穿典墳變化陳腐生鮮新大放

厥詞浩無垠雄深簡潔理則醇誅姦發潛功不泯

金華崑山維弟彘近今作者無比倫詩溯大曆追

開元調高法老韓杜均誰其賞者風雅親宣城漁

洋共綿津好奇遠涉濟與洹要觀滄海扶桑暎絳

宮明滅幻金銀旛旌羽葆排羣仙三神山近如可

捫掉頭忽往招匡君一枝笑折羅浮春歲在己未

闢賢關金臺千尺高嶙峋挾其所有謁 帝闈

宸居森嚴虎豹蹲百僚袞袞魚貫屯目視心嫉噤

不言坐令此老歸丘樊拂衣長嘯行跋躐身則否

矣名益震四方贄幣填門闈乞其隻字寶璽璠碑

版鼻鼻蛟螭蟠商丘中丞今大賢以禮招致佐雄

藩聯吟道古古處敦上牀不怕嚴武嗔先生其家

故不貧章湟舊業蓉湖濱洞庭遙指馬蹟山鄰湖

光激灑波生鱗鳧驚滅沒鵠鴉喧原田每每秔稻
翻瓜壺菘韭芥蕈繁前堂後寢疏以軒中置几杖
書琴尊擺種簞笠雜釣輪受經有子子有孫興來
行藥或灌園笑看世事如浮雲先生自謂羲皇人
世味澹泊天趣真長身豐頤鬢且鬢先生著述高
等身名山大業斯焉存豈與芝菌爭朝昏百千萬
襪貽後昆

石谷爲予畫魚川書屋圖口占二絕報之

前身知是老王維遊戲金門皓首歸莫怪比來珍
筆墨頭銜管領是清暉

石谷爲東宮書扇稱旨睿
書山水清暉四大字賜之

魚簷蝦簾抱淺沙茱萸灣口水三叉依稀燈火疎
林出山抹微雲是我家

感春五首效昌黎卽用其韻

一春無日無風埃濕雲霏霽塞不開落英滿地盡
狼藉紛何暇辨桃李梅流星驛騎大堤過縣官卽
日南巡來清塵灑道職所切封姨屏翳寧聞哉太
和蒸蒸佈元氣會煦朽壤翔春臺

蟲矸巨觚橫江來萬夫牽挽相搪挨以粟一鍾致
一石天庾浥爛成飛灰兩河南北盡曠土健兒坐
食胡爲哉昨者府帖傳詔旨截漕平糶拯兩淮

翰旋元化豈無力耆老鼓腹嬉提孩

黃河濁浪連清淮七邑沈溺吁可哀千村萬落戲

魚鼈東作無地勸犁推至尊宵旰亟清問市兒

搯腕連翩來陳言紙上盡芻狗此曹駟會非周材

嗚呼神禹世不作築室道謀誠難哉

煥乎雲漢何昭回光被草木榮江淮破格用賢

陛下聖連車倒載鄒與枚日王振旅奏大愷我亦

饒唱驚風雷斯文崔蔡或見許懷瑾欲獻羞無媒

菰蘆昂首會一躍仰看詖蕩天門開

今辰霽色何佳哉宿雲解駁青天開蕙紅菱盡森

翠葆漸逼景物趨恢台經旬不火子桑扈有眼幾
見樽與壘咄嗟人事合齟齬側望天意仍周迴商
丘中丞知我者曷不垂手援去蒿萊

補吳趨吟二首引

讀邵青門吳趨吟八首砭世勵俗深中吳儂之
病予嘗再至吳所見有槩於中者暇日補成二
首并寄青門先生俾附原詩之後雖辭意不逮
庸備輶軒之採擇或有取爾

幼伶

鬢髮束髮兒白皙乃無比疎疎看眼好粲粲脣齒

美五歲教識字從師按宮徵手口兼授受辛苦肆
鞭箠技成鄰里賀父母爲色喜挾之走四方飄然
離桑梓登場傅粉墨當筵矜爪背參軍與老鶻覲
顏不知恥本心漸放失垂老悔莫徒先王分四民
農工商賈士各各有常業服習自幼始所以風俗
完淳悶臻上理梨園肇李唐近代益波靡吳儂貫
成習比閭莫訾毀生兒教義方呂獲陷童穉隸籍
儕教坊編戶弗與齒若爲急謀生所獲寧有幾輪
輿與梓匠執一亦足恃或云此有由豪門及王邸
千金裝傀儡樂部購聲伎豈忍捐骨肉乃爲重貲

餌上好下必甚此論誠近理愚氓固難喻陋俗會
應洗何當設厲禁是用勗君子

濫刻

結繩旣已遠書契日以煩竹素事鈔謄厥力亦孔
艱刊本始石晉九經方流傳踵事製彌精累朝蓋
相沿濫觴遂橫流未若今代然白頭老講師橫身
踞坵壇餘唾拾朱程口舌如瀾翻移時變黑白其
言浩無端亦有狡獪子操觚肆譏彈假此立名譽
捷徑躋清班翩翩寡學徒聲韻粗能諳行卷如束
筍贈送多厚顏紛紜逮百家媒褻至稗官奸賈競

牟利各各爭雕鐫此事江南盛此風吳會繁薰蕕
誰能判梨棗抑何冤真堪剡谿弔翻思嬴秦燔我
欲血面請拔本塞其源六經暨子史日月懸不刊
其餘悉禁止一切從焚芟息邪而放淫庶爲聖道
閑衆喙一朝靜正始徐自還惜權不我有伊誰砥
狂瀾

石頭城

清溪屈曲水滌洄落日孤城景倩

袁粲字

哀道是石

頭偏易壞齊臺纔建又梁臺

真州資福寺秋日雜詩八首

選二

五嶽起方寸崑岷中不寬一笑姑置之掉臂尋古
歡發篋得騷經其言多煩冤荃不諒予誠虎豹守
九關惓惓睇宗國隕身向清瀾文人妨九命今古
同一觀而我抱寸心無因獻王前太息復太息掩
卷增長歎

銅鉦落西崦玉盤吐東嶺踴躍得佳觀是最愈我
病滿盈期之常金行獨也正中天彌皎潔一碧萬
里淨素心固如此孤懷皓相映鄰鐘寂不譁迨爾
發高詠

詠物六首

有序
選五

卯之役戰北歸里杜門卻掃同巷二三親昵憐
而食我遞為暝寒之會每集必是數者偕以賤
而易辦也飲啖之暇各系以言頌其功德焉詩
不云乎蓋優哉游哉聊以卒歲

腐羹

方法淮南得黎祁煮白盤諸君須及熟南史王敬則曰事須及熟是
物最驅寒佐喜尊絲滑調宜茜醋酸腐儒名字好

品壓巨源單

韋巨源有食單

醉蟹

入甕應知苦舖糟亦太狂似卿真大醉

用晉武帝語

惟爾

信無腸支解琉璃脆膏凝琥珀光微生耐咀嚼為

試長公方

坡公老饕賦蟹微糟而帶生

醃菹

月令因時蓄冬菹戒早醃朋來堪立辦食盡得頻
添極嫩無妨淡微酸也自甜從教三百甕吾道在
齏鹽

火米

俗曰炒米

豈異羣兒嗜盤堆焦穀芽乾餽吾不憾火米浪爭

誇

火米見后山叢談

簡便刪七箸鏗鏘奏齒牙談深飢可療

拾葑

去

每煎茶

炒豆

一頃南山下離離不外求種甘分虎爪豆名實小媿

雞頭賭酒枚爭數上聽歌粒暗投髯蘇空憶女良

約幾曾酬坡公與鄉人書有瓜子炒豆之約

明皇按樂圖

仙期方響野狐笙羯鼓聲低衆樂鳴畫裏阿瞞橫

醉眼爾時原不識真卿明皇聞顏真卿起兵入援嘆曰朕不識真卿爲何如人

徒步歸行

吳陵十日大雨雪船道不通步道絕古樂府話歲晏有

客思當歸縮地無術輪蹄稀城中黃生交我舊識

吻裂脣乾濟不得出門長謠行路難那辭泥淖爭

蹒跚短後雙纏皮作袴手挽馬擗首前路吁嗟乎

少陵徒步且可憐我曹不于休問天

我兄在前我僕後夔蛇相憐駉蛩負河廣冰薄光

玻璃橋危徑仄愁顛擠小兒解事誇捷足疾走衝

風比健犢道逢誰何垂車帷狐白被體冠如箕冠

如箕者向我笑我謂雲泥事難料吁嗟乎丈夫失

意方道塗區區未足分賢愚

江左十五子詩選卷十

蘇武牧羊歌

蘇武牧羊歌
蘇武牧羊歌
蘇武牧羊歌

蘇武牧羊歌
蘇武牧羊歌
蘇武牧羊歌

蘇武牧羊歌
蘇武牧羊歌
蘇武牧羊歌

蘇武牧羊歌
蘇武牧羊歌
蘇武牧羊歌

蘇武牧羊歌
蘇武牧羊歌
蘇武牧羊歌

蘇武牧羊歌
蘇武牧羊歌
蘇武牧羊歌

蘇武牧羊歌
蘇武牧羊歌
蘇武牧羊歌

